

Kristian Tlangau

CHHUAH TAN KUM - OCTOBER 1911



Zoram dam nân engkimah...

- Aiawhsaktu Krista
- Beihrualin kum za a tling dâwn ta
- Presbyterian Kohhran lungphûm

Editorial • Mizoram Synod • Lâwrkhâwm • Zawhna leh Chhânna

Kum 107-na

August 2018

Bu 1,271-na

Editor : Rev. Dr. C. Chawngmingliana Ph. 2316411(R)
Joint Editors : Rev. P.C. Pachhûnga
Upa H. Ronghâka
Upa Prof. R.L. Thanmawia
Rev. P.B. Mankima
Business Manager : Upa C. Lalbiaktluanga
Synod Office, First Floor
Mission Vêng, Aizâwl – 796 001
Office Phone 2324590; e-mail: kristiantlangau@yahoo.co.in

Kum khat lâk man : ₹ 50.00. Bu khat man ₹ 4.16

A man pe leh a bu la duh chuan Business Manager, Synod Office First Floor, Mission Vêng, Aizâwl hriattîr tûr.

Thu chhuahte hi Editor ngaih dân a ni vek kher lo.

A CHHÛNGA THU AWMTE

1. Editorial	1
2. Mizoram Synod	2
3. Lâwrkhâwm	9
4. Zawnha leh Chhânna	16
5. Sermon: (1) Zoram dam nân engkimah....	23
(2) Aiawhsaktu Krista	26
6. Beihrualin kum za a tling dân ta	28
7. Presbyterian Kohhran lungphûm	34
8. Synod Hospital-a thisen pêk chungchâng	40
9. Sûnna	43

Synod Puipate

Moderator : Rev. F. Lalrinnunga
Secretaries : Upa R. Dêngzikpuia (Sr.)
Rev. R. Vânlalngâka (Jr.)
Finance Officers : Rev. P.C. Pachhûnga
Rev. H. Remthanga
Statistician : Rev. R. Lalnuntluanga
Sr. Executive Secretary : Rev. Lalramliana Pachuau
Executive Secretary : Rev. B. Sângthanga

The Organ of the Presbyterian Church, Mizoram



Editorial

THIM LEH ÊNG

Nihphung leh ze inang lo zet mai, hnathawh pawh inang lo tak, inhal tak, ui leh kêl thlun pawlh ang maia awm dūn thei hauh lo chu thim leh êng hi a ni. Khawvêl sual tak hi thim nêh tehkhin a ni a. Sualna nei lo Pathian chu êng nêh tehkhin a ni. Chu khawvêl sual thim chhah tak tieng tûr chuan Krista (khawvêl êntu) chu a lo kal a, thimin chu êng (Krista) chu a hre tlat lo mai kha thil mak tak a tling.

Thim leh êng chu inngeih lo tak, awm dūn thei hauh lo an ni a. Thimah êng a lo kal/luh chuan thim chu a rang a rangin an tlan chhuak nghâl mai, a chhuak ve hman lo chuan ban an phên fâr mai zu nia! Ringtute hi khawvêl êng tiin Lal Isuan a sawi a. Ringlote erawh chu thim zînga awm an ni. Thim zînga awm, ringlote chu thimin a ngam loh êng Krista chuan a chhun êng a, Krista zârah tihênin an awm a, khawvêl êng an lo ni ve ta.

Thimin a ngam hauh loh chu êng hi a ni a. Setana leh a tirkoh, khawvêl mite hi thim an nih tlat avângin chak viau angin lang tshin mah se, khawvêl eng Krista leh ringtute chu hnehtu leh ngamtu zâwk an ni leh nge nge tshin. Ringtu nun chu thiminrawn bawhin a êng chu chuai tial tial mah se, Krista êng a lâk luh rual rualin thim a bo ang a, Krista thiltihtheihna chuan a chhun êng leh ang. Thim hi tlan chhiatsana hneh chi a ni lo va, chhûngril nuna Setana awm pawh hi khawvêl phêna hmanga bihrûksana hneh chi pawh a ni bawh hek lo. Thim hneh dân tsa ber chu êng awmnaa pho chhuah emaw, thim zînga êng lâk luh emaw hi a ni zâwk. ‘Nang muhîl meng la, mitthi zîng ata tho rawh; tichuan Krista chuan a chhun êng ang che.’



MIZORAM SYNOD

*– Executive Secretary
i/c Publicity, etc.*

1. Chhawmdâwlina pe

Tun hnaia harsatna hrang hrang tâwkte hnênah Synod Relief Fund ațangin hetiang hian chhawmdâwlina pêk a ni:

Leimin tuar chhûngkaw 20 hnênah ₹1,64,000, thlipui tuar chhûngkaw pakhat hnênah ₹10,000, damlo țanpui ngai chhûngkaw pali hnênah ₹32,000, accident tâwk chhûngkaw pakhat hnênah ₹8,000, tuilian tuar chhûngkaw pahni hnênah ₹16,000. A vaiin ₹2,30,000.

2. SL&PB

June 30, 2018 khân Chhînga Vêng Bialah Literature Seminar neihpuiin Rev. Dr. C. Chawngghmingliana, Editor, SL&PB leh Rev. C. Rosiama, Mission Vêng te an kal.

3. MSSU

Sunday School Zirtîrtu Training neihpuiin MSSU Office staff leh MSSU Trainer-te hetiang hian an kal chhuak.

♦ June 16, 2018 khân Rawpuichhîp Kohhran leh Chungtlâng Kohhranah Upa Lalțahluna Râlte, MSSU Asst. Co-ordinator, Upa K. Vânlalngghâka, Ramhlun East, Upa H. Lalvulliana, Ramhlun Vênglai, Upa K. Zoremsânga, Kulikâwn leh Pu Lalthan-chhûnga, Bûngkâwn te an kal.

♦ June 16, 2018 khân Tanhril Kohhranah Pu John Lalhruaitulanga, MSSU Asst. Co-ordinator, Upa Lalrosânga Kâwlni, Lily Vêng leh Upa B. Lalhmunliana, Bethlehem Vênglai te an kal.

♦ June 23-24, 2018 khân Chhingchhîp Mualpui Kohhran leh Hualtu Kohhranah Upa Lalțahluna Râlte, Upa R. Lalhmingthanga, Upa K. Zoremsânga leh Upa F. Zakhûma te an kal.

♦ June 30, 2018 khân Kâwnpui Bialah Pu John Lalhruaitulanga, T. Upa V. Lalrindika, Sihphîr Vênglai leh Upa K. Vânlalngghâka te an kal.

♦ June 30, 2018 khân Tlungvêl Bialah Upa Lal̄thahluna Râl̄te, Upa R. Lal̄hmingthanga leh Upa S. Kapzathanga te an kal.

4. Bookroom

♦ June 12, 2018 khân Synod Bookroom, Vaivakâwn Branch thar chu Synod Moderator, Rev. F. Lalrinnungan a hawng. Heti hian Synod Bookroom chuan Branch 15 leh Distributor 37 a nei ta a ni.

♦ June 14, 2018 khân Synod Bookroom chuan kum tina an lo tih th̄in angin Synod Bookroom Conference 2018 chu JM Lloyd Hall, Synod Office-ah an hmang a, he hunah Bookroom sum dinhmun report te, Branch tin report te leh kum kal ta chhûnga Branch ti th̄a thlanna hun te hman a ni a. He hun hi Rev. P.C. Pachhûnga, Exe. Secretary i/c Prescom-in a hmanpui a, tehna hrang hranga Branch ti th̄ate hnênah hetiang hian lawmman a sem nghâl:

Pakhatna : Synod Bookroom, Bâwngkâwn Branch

Pahnihna : Synod Bookroom, Chanmari Branch

Pathumna : Synod Bookroom Hqrs. Showroom, Aizawl.

5. Revival

♦ June 5-9, 2018 chhûng khân Synod Revival Camping Centre, Neihbâwihah camping buatsaih leh a ni a. Speaker atân T. Upa Zârzoliaana, Siamthar Lehna Team hman a ni. Camp-a lût zawng zawng hi mipa 183 leh hmeichhia 21 an ni a. Eng emaw harsatna avânga camp awm tluan thei lo an awm bawk. Camp chhûnga mawhphurhna hrang hrang hi Bethlehem Vênglai Pastor Bialin an buaipui a ni.

♦ June 8-10, 2018 chhûng khân Operation Nehemia neih leh a ni a, hemi hunah hian Synod Revival Speaker 40 kalin group rukah in̄then darh a ni a. Aizâwl khaw chhûng leh dai vêlah te hun an hmang a, mi eng emaw zât hnênah rawng an bâwl a ni.

6. KṚP

♦ June 12-14, 2018 chhûnga India Mission Association-in Guwahati-a Youth Conclave a buatsaihah KṚP aiawhin mi pasarih an kal. IMA Youth Conclave-ah hian Central KṚP aṭangan Tv. C. Malsâwmtluanga leh T. Upa Lalrinmawia Râl̄te, committee member an kal a. Bial

aiawh mi panga - Nl. Zodingpuii Râlte, Mission Vêng Bial, Tv. P.C. Lalnunmawia, Ramhlun North Bial, Pu P.C. Lalrinliana, Sihphîr Bial, Tv. HD Lalêngzauva, Châltlâng Bial leh Tv. Mikey Zohmingliana, Dâwrpui Bial te an kal. Youth Conclave-ah hian IMA chuan a thawhpui kohhran leh mission pawl hrang hranga thalaite ko khâwmin tûnlai khawvêla thalaite rilru sùkthlêk zir chiana hêng thalaite zînga hlâwk zâwka rawngbâwl dân tûr an sawi ho a ni. Hetiang lam hawi inkhâwm hi IMA hian tûn hi a wawi khat buatsaihna a ni.

♦ June 25, 2018 khân Saron Vêng Branch-ah YRC pual inkhâwm buatsaih a ni a, CKTP aţangin YRC Sub-Committee-ten an hmanpui.

7. Kohhran Hmeichhia

♦ June 14, 2018 khân Central Kohhran Hmeichhe bultumin ‘Danglamna thlen tûrin huaisen rawh’ tih thupui hmanga inrâwn khâwmna hun Pi Zaii Hall, Synod Conference Centre-ah an hmang a. Thupui hi hlâwm thumah then lehin resource person atân mi pathum

hman an ni a. ‘Danglamna a awm theih nân Bible i chhiar thar leh ang u’ (Prof. Lalnghâkthuami, ATC), ‘Hmeichhe chungchânga Bible leh Pathian thu zirna’ (Nl. Zohmangaihi, Regional Secretary, AISSA) leh ‘Ei leh bâr zawinnaah leh sawrkâr inrêlbâwlinaah danglamna thlen tûrin huaisen rawh’ (Prof. Lalneihzovi, MZU) tihte zir ho a ni a. Thupui zir zawh apiangin sawi hona hun hman a ni bawlk.

October 25-26, 2017 khân Presbyterian Women Fellowship (PWF) bultumin Diphu, Darbi Anglong-ah tûna inrâwn khâwmna ang hi hman a lo ni tawh a. Hemi ţuma kal khâwmte hian Unit tinah mahni ţawnga leta inrâwn khâwmna hi hman vek ni ve tia an rêl angin Mizoram Presbyterian Kohhran Hmeichhiate hian tûn ţumah hian an buatsaih a ni.

8. SMTC-ah trade thar

June 14, 2018 khân Synod Multipurpose Training Centre-ah trade thar pahnih - Mobile repairing leh beauty culture zirna chu Rev. P.C. Pachhûnga, Executive Secretary i/c SMTC-in Pathian hnênah hlânin a hawng. Heti hian SMTC-ah

hian trade thar panga neih a ni ta a ni.

9. Prison Ministry

♦ June 17, 2018 khân Prison Ministry Committee member-ten Kolasib Dictrect Jail an tlawh a, Kolasib Kohhranah campaign-in hun an hmang zui.

♦ July 1, 2018 khân Central Jail-ah hun hman a ni a, Rev. B. Sângthanga, Executive Secretary, Rev. R. Lalvulluaia, Director, Prison Ministry leh committee member-te: Rev. R. Lalnuntluanga, Rev. C. Lalram-chhana leh Rev. Lalsângmuana te an kal a. Luangmual Branch KTP-in an tawîawm bawk. Hemi tum hian a vawî khat nân Masihi Sangati-ah inkhâwmna buatsaih a ni bawk.

10. Campus Ministry

♦ June 13-14, 2018 chhûng khân Director leh Counsellor-ten Winsome English School, Chhînga Vêngah retreat an neihpui.

♦ June 19, 2018 khân ‘Embrace HIV & AIDS Innovation Project- Adolescent HIV Intervention’ seminar SHALOM buatsaihah sâwm an nih angin Director leh Counsellor

an kal a, Synod Social Front aiawhin Rev. Zoramsânga a kal bawk.

♦ June 26, 2018 khân Apollo School of Nursing, Luangmualah hun an hmang.

11. Social Front

June 23, 2018 khân Mamit leh Kolasib Hmârvêng Pastor Bialah Political Education Seminar hman a ni a. Mamitah Pu R. Lalnuntluanga, Co-ordinator, Social Front, Upa C. Chawngthantluanga leh Revd Chuauthuama te an kal a, Kolasib Hmârvêngah Rev. Zoramsânga, Synod Office leh Upa CH Thangkhûma te an kal.

12. Finance

June 23-24, 2018 khân Sialhâwk Bialah Finance Campaign neihpuiin Rev. P.C. Pachhûnga, Exe. Secretary, Upa P.C. Vânlalrova, Synod Office, Rev. K. Lalhmuchhuaka leh Upa K. Lalthakima te an kal.

13. Hindi Bible School Graduation Day

♦ June 13, 2018 khân Presbyterian Hindi Bible School chuan an zirlai batch 61-na Graduation Day an hmang.

PHBS hi August 24, 1990 khân hawn a ni a, hun lo kal zêlah Synod chuan India ram hmun hrang hrangah Mission Field a hawn tâk zêl avângin state hrang hrang leh ram pâwn - Nepal leh Bhutan ațangte pawhin zirlai an lo kal thîn. A din tirha thla thum course ni thîn kha kum 1998 ațangin thla ruk course a ni ta a, kum khatah batch hnih zirtîr thîn an ni. Kum 2009 ațangin Synod-in a rêl angin Certificate of Theology (C.Th)-ah upgrade a ni a, a din tirh ațanga tûn thleng hian zirlai 1,577-in an zir chhuak tawh a ni.

14. Lay Leaders' Training

June 19-25, 2018 chhûng khân Synod Multipurpose Training Centre, Mission Vêngthlangah Lay Leaders' Training vawi 203-na chu Rev. P.C. Pachhûnga, Executive Secretary-in a hawng a. He training-ah hian Presbytery pathum - Aizâwl East, Aizâwl Central leh Tuichangrâl South Presbytery ațangin Kohhran Upa 29 an tel thei a. Rev. Lalhlûma Sailo, Rev. C. Chawngliana leh Rev. Vânlalzuata ten training hi an neihpui a ni. Lay Leaders'

Training vawi 203 neih tawhah Kohhran Upa 6,512 an training tawh a ni.

15. Kohhran Inpumkhatna chungchâng seminar

July 6, 2018 khân Kohhran Inpumkhatna chungchâng seminar thawh khatna chu Aizâwl District huam chhûng tân buatsaih a ni a, seminar hi *zone* thumah thenin hetiang hian hman a ni:

Zone I

Ahmun : Mission Vêng Kohhran Hall

Hruaitu : Upa R. Dêngzîkpuia, Secretary (Sr.)

Paper

chhiartu : Rev. H. Remthanga, Finance Officer

Zone II

Ahmun : Zârkawt Kohhran Hall

Hruaitu : Rev. R. Lalnuntluanga, Statistician

Paper

chhiartu : Rev. Dr. H. Vânlalauva

Zone III

Ahmun : B â w n g k â w n Kohhran Hall

Hruaitu : Rev. P.C. Pachhûnga, Exexutive Secretary

Paper

chhiartu : Rev.Dr.H. Lalrinthanga

16. Education

Kumin 2018-2019 Financial Year kan hman mêkah Presbyterian English School-a Grant chi hrang hrang sem tawh dân chu hetiang hi a ni:

PES building Grant ₹90,00,000 (school 30 hnênah ₹3,00,000 theuh).

Lump Sum Grant ₹1,00,80,000 (elementary school 84 hnênah ₹1,20,000 theuh).

Lump Sum Grant ₹30,00,000 (secondary school 20 hnênah 1,50,000 theuh)

Adhoc Grant school ₹6,60,000 (school 22 hnênah ₹30,000 theuh). A vaiin ₹2,27,40,000.

17. ATC

June 13, 2018 khân ATC zirlai Academic Session 2018-2019 tan tûrin an lût khâwm leh tawh a. June 14, 2018 khân Principal-in thingpui buat-saihsakin inlawmna hun hman a ni. June 18, 2018 aţang khân class kal tan nghâl a ni a, zirlai an neih dân chu hetiang hi a ni:

BD I - 26, BD II - 29, BD III - 27, BD IV - 27, M.Th. I - 28, M.Th. II - 34, D.Th. I - 2, D.Th. II - 2, D.Th. III - 2, DCPC - 3. An vaiin 180 an ni.

18. Mission Board

Kumin 2018 May thla thlenga Field hrang hranga ringthar neih dan report kan dawn chin hetiang hi a ni:

S/No. Field ringthar zât

1. Arunachal East	92
2. Arunachal North	75
3. Arunachal West	61
4. Assam	32
5. Barak	200
6. Delhi	33
7. Jharkhand	178
8. Karbi Anglong	16
9. Home Mission North	47
10. Home Mission South	52
11. Kolkata	476
12. Lucknow	137
13. Nepal	52
14. Odisha	29
15. Patna	56
16. Siliguri	121
17. Tripura	774
18. Masihi Sangati	836
Total	3267

19. Moderator Programme

Synod Moderator Rev. F.
Lalrinnunga chuan hetiang hian
hun a hmang:

June 16, 2018 (Inrinni) zân

Kaisanari Kohhran

June 17, 2018 (Pathianni)

Chawhma : Tlângpui Kohhran,
Kaisanari Bial

Chawhnu : Telkata Kohhran,
Kaisanari Bial

Zân : Kahrawt Kohhran,
Kaisanari Bial

June 22, 2018 (Zirtâwpni) zân
Noagang Kohhran

June 23, 2018 (Inrinni) zân

Khumlung Kohhran

June 24, 2018 (Pathianni)

Chawhma : Ruprai Kohhran

Zân : Tuidu Kohhran

July 5 - 18, 2018

PC Wales General Assembly

July 21, 2018 (Inrinni) zân

Dârlâwn Chhimvêng Kohhran

July 22, 2018 (Pathianni)

Chawhma : Sâwleng Kohhran

Chawhnu : Sâwleng Hmuntha

Zân : Dârlâwn Kohhran

July 28, 2018 (Inrinni) zân

NE Khawdungsei Vênghlun
Kohhran

July 29, 2018 (Pathianni)

Chawhma : Khawkâwn Kohhran

Chawhnu : Chiahpui Kohhran

Zân : NE Khawdungsei
Kohhran

PATHIAN THU ZIR DUH TÂN

Presbyterian Bible School, Mission Vêng, Aizâwlah C.Th
(Certificate in Theology) zir tûr lâk a ni leh dâwn a, dîl duh chuan
hêng hi hriat tûr a ni e.

1. Admission Form ₹10-in office-ah lei tûr a ni a. August 21, 2018
tlai dar 3:00 thleng PBS Office-ah theh luh theih a ni. Dîltu chu
class VII pass/Middle School exam pass, kum 16 aia naupang
lo, kohhran dân chhûnga awm a ni tûr a ni.
2. August 28, 2018 zîng dâr 10:00-ah interview tûr a ni a,
September 3, 2018-ah class ʔan a ni ang.
3. Zir hun chhûng thla li i.e. September - December, 2018 a ni.
Hre Chiang duh tân Phone No. 2317343/2325082/9436198231-
ah zawh fiah theih a ni. Hostel a awm lo.

Sd/- Rev. Lalneihvûra

Principal

Presbyterian Bible School



Inkhâwm boruak tih- tûnlaina kawngah kal thui

United States-a khawpui pakhat Atlanta-ah Embassy Church International chuan thalaite an hîp khâwm theih nân an inkhâwm boruak a tûnlai thei ang berin an kalpui a. An inkhâwm boruak chu hlim taka Pathian fakna hla sak te, kut ben te, Pathian fak ho ringawt te ni lovin Biak In aia concert-na hmun ni zâwk mai âwm takin an chei bâwl a. Concert hall-a êng an hman ang chite an chhî a, chhûm lemte an zâmtîr chuai chuai a, hriih lâwkna thute bangah an ziaik chuai bawk. Hêng bâkah hian hrui hmanga boruaka inkhai te an ti bawk a. Hêng an thiltih zawng zawng hi inkhâwmnaah thalai tam zâwk an hîp khâwm theih nâna an hma lâkna a ni.

He kohhran Pastor Ajni Brown chuan he an thiltih aţang hian thil ropui tak an tawn thu a sawi a. “Pathian biak inkhâwm boruak a nung a, miten kan inkhâwm boruak kal tlangin Pathian ropuizia an hmu a, damna te pawh an chang a ni. Kan inkhâwm boruak aţanga tawnhriat ropui tak tak an nei tih kan hriat hian min tiphûr tak zet a. Kan remhriatna avângin inkhâwm boruak kan vawrh kâng hle a ni,” a ti.

Embassy Kohhran hi kum nga liam taah khân college aţanga zir chhuak hlim mi 12, kohhran hrang hrang aţanga kal khâwmten an din a ni a. Kum hnih vêl chhûng chu a dintute bâk hi an pun belh lêm lo va. Tûnah chuan kâr tina inkhâwm zât hi mi 400 vêl an ni tawh a. Pastor Brown-a chuan, “Hun rei tak chhûng chu kan inkhâwmnaah hian hêng chhûm lem te, êng de sup sup te hi hmang lovin inkhâwm boruak duan sa ţha takin kan hmang a, chutiang chuan kan kal mai a. Mahse, tûnlai Kristiante hi chu an thil hmu hian a kaihhruai nasat êm avângin hêng kan hmanraw

hman belh takte hian Pathian biakna boruak tak takah a hruai lût a ni,” a ti.

Kohhran hruaituten an sawi dân chuan tûn hnaia zir chiannaah US-ah hian inkhâwm thîn zât a tla hniam nasa hle tih a lang a. Kuminah hian American zînga 20% aia tlêm hi inkhâwm zat zat thîn nia ngaih a ni a. Chu vâng chuan tûnlai mite mil tûra inkhâwm boruak tihdanglam hian mite a hîpin, inkhâwm pawh an pun phah tûrah an ngai a. Brown-a leh a thawhpuite pawh hian thalaite hîp tumin an theihtâwpin an inkhâwm kalphung hi an titûnlai a ni.

Tunlai thiamna hmanga inkhâwm boruak tihdanglam hian thalai tam zâwk hîp khâwma kohhranin a thán phah nia ngaih a nih mêk lai hian Kristian puitling zâwkte leh Pathian biak inkhâwm chungchâng zirtute erawh chuan hlauhthâwn lian tak an nei a. Ann Brock, mi hângho kohhran inkhâwm chungchâng ziaik thîn chuan Embassy Kohhran hruaitute hi an kal thui mah mah tawhin a hria a. “Pathian biakna tak tak aţang hian hlimhlawpna

lamah an kal pêng zâwk ang tih ka hlau a ni. Kei leh Kristian dangte pawhin Pathian hian a anpuin min siam tih kan pawm vek a. Siamtu chuan ropui takin, thil thar tha hmu chhuak thei tûrin min duang ngei a. Mahse, tûnlaia thenkhatin kan inkhâwm kan kalpui dân hi chuan ngaih a ti tha tawh lo. Khawvêl mite nêna mi hîp khâwm tûra kan intlânsiakna lamah Biak In chhûnghah êng de chuai chuai te, chhûm lem te leh thil dangte kan la lût ta! Thil thar chin chhuah hi a that theih viau laiin a chheh vêl boruak hian Pathian fakna tak tak hi a hliah khuh daih a hlauhawm a ni,” a ti.

Seattle khawpuia Quest Kohhran pastor a nihna aţanga a inhnuhdawh hnu lawkah Eugene Cho chuan, “Tûnlaia Kohhrante hian êng rawng hrang hrang kah chhuahna khâwl te, chhûm lem tichhuak thei khâwlte aiin tlâwmna nun tak tak leh Thlarau Thianghlîma awmpuina leh a kaihhruaina rin ngam hi kan mamawh a ni,” a ti bawk. He a thusawi hian Pathian biak dân chungchângah inhnialna a hring chhuak nasa hle.

- CHRISTIAN POST

Pathian thuziak sem avângin Jail tâng dân

Canada rama Kristian driver pakhat Bill Whatcott-a chuan mahni anpui kawpten kawng an zawhnaah “Mahni anpui kawp hian natna a thlen thei a. Mahni anpui kawp chingthe hian an nun an sim chuan Lal Isuan a ngaidam thei a ni,” tih inziahna lehkha a sem avângin ‘tum rêng avânga mahni anpui kawpte huatna thu tipunluntu’ tiin Toronto Police-ten an man a ni.

Lehkha ziak a semah hian mahni anpui kawpna hi inpâwna aṭanga natna inkai theih nêna a kal kawp tlat a ni tih thu US Centers for Disease Control pawhin an nemngheh chu a chuang a. Hei bâkah hian Liberal Party leh left-wing politician-te pawh na taka demin, mahni anpui kawpte an thlâwpna hi inchiṭhira an bânsan loh chuan chatuana boralna an hmabâk thu a chuang bawh.

Nimahsela, The Daily Wire-in a sawi dân chuan, he a thuziak sem darh hian mahni anpui kawpte huatna lam emaw, tharum thawh tûra infuihna lam emaw a sawi lo va. He lehkha

ziak semtu Whatcott-a hi a hna aṭanga dân a ni a, Police station-a hrên a nih chhông pawhin dârkâr 24 lai chaw pêk loh nia sawi a ni bawh. He thil hi Whatcott-a hian tum rêng vânga a chung a thlentîrah a ngai.

Whatcott-a hian a ke nâ pawh an ngaihsak lo hle niin a sawi a. “Ka ke a nâ a, damdawi in panpui ngai hialin ka awm a. Mahse, doctor-in damdawi min chawh pawh min ngaituhsak duh lo va. Ni li lai damdawia enkawl lohin ka awm a, ka ke nâ pawhin a zual phah hman viau a ni,” a ti.

Canada Prime Minister Justin Trudeau-a hi Roman Catholic ni mah sela ram hruaitu lu ber zînga mahni anpui kawpte kawng zawhnaa tel hmasa ber a ni a; July, 2016 khân Toronto khawpuia kawng an zawhnaah a telpui a. Mahni anpui nêna inneihna (same sex marriage) thlâwpntu langsar tak a ni bawh.

Angus Reid Institute chuan kum 2016 tâwp lam khân Canada ramah hian mipui ngaih dân a zir chiang a. Heta a lan dân chuan Canada rama mipui

tam zâwkin inen hran lohna dân huang chhûnga sawrkârin mahni nihna thlâkte a telh thar chu an thlâwp a. Trudeau-a kaihhruai Liberal Party hian mipa hmeichhiaa inlet leh hmeichhia mipaa inlette en hran loh tûr tih dân siamin, he dân bawhchhetute chu kum hnih chhûng jail tâng tûra hrem theih an ni.

Kumin kum tîr lam khân Ontario biala nau piangte chu an birth certificate-a ‘mipa’ tih emaw, ‘hmeichhia’ tih emaw paihtîr emaw, ‘non-binary’ tia ziah emaw an phalsak a ni. Evangelical hruaituten he hma lâkna hi an duh lo hle a, Rev. Franklin Graham-a pawhin, “Pathian hian mipa leh hmeichhiaah min siam a ni,” a ti.

- CHRISTIAN POST

North & South Korea Kohhran hruaituten dawkân khat an kîl ho

North Korea leh South Korea rama Kohhran hruaitute chu June ni 22 leh ni 23, 2018 khân Switzerland-a khawpui pakhat Geneva-ah an inhmu khâwm a. He an thut khâwmna hi Korea rama remna te, inunau

thar lehna te, thawh honain hma a sâwn zêl theih nân tea Kristiante thawh hona {Ecumenical Forum for Peace, reunification and Development Cooperation on the Korean Peninsula (EFK)} tiin an vuah a. “Remna zawngin a ûmin ûm rawh u,” tih chu an thupui ber a ni.

He inhmu khâwmnaah hian North Korea aţangin Korean Christian Federation (KCF) hruaitute leh South Korea aţangin National Council of Churches of Korea hruaitute an tel a. “Panmunjom Summit leh Singapore-a United States leh North Korea inbiakna thute a taka a chana, Korea rama boruak tha a awm chhoh zêl theih nân he lai ram bialah inhuatna leh indona chawk chhuak thei zâwnga hma la lo tûrin ram hrang hrangte kan ngên a. Thawh hona boruak tha zâwk a awm zêl theih nân North Korea ram sum leh paia hrêkna hi hlih vat ni se kan ti a. Tûna remna boruak inmung chho mêk hi Pathian hnathawh leh kan ţawngţai chhânna ni ngein kan ngai a. A bîk takin Panmunjon thuchhuah avâng hian kan lâwm

tak zet a. Korea ram pahnih hruaitute thinlungah remna, hmuingîlna leh insuih fin duhna hawi zâwnga inthlâk danglamna lian tak lo thleng hi a lâwmawm tak zet a ni,” an ti.

Panmunjon thuchhuah hi kumin April ni 27 khân Korea rama remna, hmuingîlna, insuih finna a awm theihna atâna South Korea hruaitu Moon Jae-in-a leh North Korea hotu ber Kim Jong-un-a ten an siam a ni a. “Panmunjon thuchhuah kha kan thlâwp tlat a. Korea rama remna leh muanna a awm theihna tûra bung thar kan kaina a ni,” an ti.

Panmunjon thuchhuah hi a taka a chan theih nân Kohhran hrang hrangte leh khawvêl ram tina thil tha duhtute chu EFK hi thlâwp tlât tûrin an ngên bawk.

- ECUMENICAL NEWS

Pope Francis-a’n Kristiante unauna a duh thu puang nawn

Roman Catholic Kohhran hotu lu ber Pope Francis-a chuan World Council of Churches (WCC) hmunpui Geneva-a mi chu tlawhin, WCC kum 70 tlin lawmnaah thu a sawi

a. WCC Ecumenical Center-a thu a sawinaah hian Pope Francis-a thupui ber chu ‘Kristiante inunauna’ a ni.

Pope hi Switzerland President Alain Berset-a leh a thawhpui dangten thlawhna tum hmunah lo hmuakin, Beset-a hian chanchinbu mite chu Pope Francis-a’n remna leh muanna leh mihring dikna leh chanvo humhalh a aupui chu a thlâwp tlat thu a hrilh a ni.

June 21, 2018 khân Pope Francis-a hian WCC Ecumenical Centre hi tlawhin Kristiante inpumkhatna kawnga kan kawng zawh leh chumi kawnga harsatna kan tawhte chungchâng a sawi a: “Kristiante tân chuan thawh hona hi kan dinhmun sawh nghet tûra hmanrua mai ni lovin, Pathian thu kan âwih a ni tih kan lan chhuahtûrna a ni zâwk. Tih tak zeta inunauna kawng kan zawh deuh deuh theih nân Pathian tanpuina i dîl thîn ang u. WCC din champha phâk vawi 70-naah hian keimah ngei lo tel ka duh avâng a lo kal ka ni a. Chu bâkah chuan Roman Catholic Kohhran hian Kristiante zînga

inpumkhatna leh thawh hona tha tak a awm hi a duh tak zet a ni tih hi rawn sawi nawn leh ka duh bawk a ni. Lalpa Tawngtaina hmanga kan tawngtaia ‘Kan Pa’ kan tih hian ‘a fapate leh fanute’ nih inhriatna rilru kan nei thin; chu bâkah chuan ‘unaupate leh unaunute’ kan nihzia a tichiang hle thin. Tawngtaina hi Kristianten inpumkhat tûra kan chakna hnâr a ni. WCC hi Kristiante inpumkhatna leh thawh hona boruak atanga lo piang a ni a; kohna chak leh ropui tak, anmahni pawh an inpumkhat loh chuan Kristianten engtin nge Chanchin Tha an hril theih ang tih chhanga lo zi chhuak a ni a. Inpumkhat tûra koh kan ni a, inpumkhatna hi dawhkâna rawngbâwl leh mihring dinhmun chawi sanna ai pawha pawimawh zâwk, kan nihna hriltu a ni,” a ti

WCC hi 1948 khân din a ni a. Orthodox, Anglican, Methodist, Baptist, Lutheran, Reformed Churches leh a dangte awm khâwmna, Kristian maktaduai 550 chuante hui khâwmtu a ni a. Switzerland-a Geneva khawpuiah hmunpui a

nei a. Roman Catholic Kohhran pawh hi WCC member ni lo mah se WCC pêng khat Faith and Order Commission member a ni ve a ni.

WCC leh Roman Catholic Kohhran hi Pope John Paul XXIII-in Vatican Inkhâwmpui Pahnihna (Second Vatican Council) 1959-a a koha, Roman Catholic a inhawn zau deuh hnu atangin official takin an indâwr tan a ni.

- ECUMENICAL NEWS

CCA hruaituten Asian Kristiante an tlawh

Christian Conference of Asia (CCA) hruaitute chuan an pâwla tel kohhran member Arabian Gulf vêla hna thawka awmte tlawh chhuakin an harsatna tawhte an ngaihlâksak a. CCA committee member leh hnathawk 13 zin chhuakte hi New Zealand, Taiwan, Philippines, Korea, Nepal, Sri Lanka, Thailand, Laos, Sri Lanka, Indonesia, India, South Korea leh Malaysia atanga kal khâwm an ni.

CCA aiawhte hi India, Sri Lanka, Philippines, Korea,

Bangladesh, Pakistan leh Indonesia mi te inkhâwmna hmunah kalin an inkhâwmnaah an telpui a. Dubai khaw daia Mor Ignatius Jacobite Syrian Orthodox Church-ah United Arab Emirates (UAE)-a Asia Kristian inkhâwm thînte aiawh nênh inhmuh khâwmn Arab rama Asia mi hnathawkten harsatna an tawhte an ngaithla a ni.

CCA General Secretary Dr. Matthews George Chunakara chuan, “CCA Executive Committee a thut hma kâra UAE-a Asian Kristian inkhâwmna hmun hrang hrang an tlawh hi CCA-in a member-te a ngaihsakzia lantîrna leh Arab rama hnathawk Asia mite dinhmun tak tak hriat thiam tumna a ni,” a ti.

CCA aiawhte hian hnathawkte chênna hmunte tlawhin an dinhmun tak tak an zir chiang baw a. CCA General Secretary chuan Asia chhûng leh pâwna awm hmun nghet lova

awmte ngaihsakna thu kal zêlah hian November, 2018 hian khawvêl huapa kohhran hruaitute inhmuh khâwmna hun an buatsaih tûr thu a sawi baw.

Arabian Gulf-a hnathawka awm, Kristian inpâwl khâwm ve thînte hi India, Pakistan, Bangladesh, Nepal, Sri Lanka, Thailand, Myanmar, Philippines, Indonesia leh South Korea aţanga kalte an ni.

Solomon David, he CCA hruaitute feh chhuahna huaihawttu ber chuan, “Tûna kan hma lâkna hi Gulf rama Asian awmten harsatna an tawh sut kian theih nâna Kristiante thawh ho dân a awm thei ang em tih kawng zawna a ni,” a ti baw.

CCA Vice Moderator Rev Diana Tana chuan Gulf rama Asian Kristianten duhsak taka khual tha anga an lo dawnawn avângin lâwmthu a sawi baw.

- CCA.ORG.HK

Isua Krista hi Pathian a niha ka tân a thih baw si chuan; a tâna ka inpêk venaah hian lutuk a awm thei lo rêng rêng a ni.

- C.T. Studd



***Lalmuchhuaka,
Bâwngkâwn zawhna***

Z. Kristian Hla Bu tâwpah hian Ṭawngṭaina dah a ni a. Lal Isua hmingin kan dîl e, Amen, tih te, Isua Krista hmingin kan dîl e, Amen tih te kan hmang a. Hei hi eng tik lai aṭangin nge kan hman le? Ka ngaih dân chuan Isua Krista hmingin kan dîl a che, tih loh hi chu Amen har ka ti deuh a, entîr nân, mi chingal va dîl ila, “Chingal ka dîl e,” va ti ila a tu ber khân nge mîn chhâng ang? Tu maw chingal i dîl a? mîn ti mai lo’ng maw? Isua Krista hmingin kan dîl a che tih hi kan ṭawngṭai dân tûr chu a ni zâwk lo maw? Pastor leh Upate pawh hian an hmang nasa si a.

Ch. Sl&PB pawhin Mizo ṭawng hman dik tih thupui hmanga Literature Seminar kan neihpui hian ‘kan dîl a che’ tih tûr tiin kan lo aupui ve mêk bawk a ni.

***PC Kâpṭhuama, Govt.
Complex zawhna***

Z. Chanchin Ṭha Matthaia ziak 11:12-a Baptistu Johana lo awm achin tûn thlengin, vânrâm chuan beih vakna a tâwk ṭhîn a, a bei vakte chuan an pâwng lâk ṭhîn, tih leh, Luka 16:16-a dân leh zâwlneite thu chu Johana lo awm thleng khân a awm a, chumi achinah chuan Pathian ram Chanchin Ṭha hi an dîla mi tin an lût lui ṭheuh a; nimahsela, dân thu chhun han te tak tê bo ai pawhin vânrâm leh khawvêl boral a awl zâwk e.

1. Matthaia leh Luka te thusawi hi thuhmun a ni em?
2. Engti ang taka beih vak tûr nge?
3. Lût lui tih leh bei vak tih te hi thuhmun a ni em?
4. Dân leh thupêkte hi ṭhenkhatin awm tawh lo ang maia an sawite hi engtia ngaih tûr nge?
5. A bâk pawh kha chhângin han sawi chiang teh.

Ch. I zawhna hi Bible-a thu harsa berte zînga mi, sawi fiah thiam harsa tak a ni a. I zawhna

lah hi bapui tuai loh ang maiin a kâk te-tu mai bawk si a. Chhâng fiah viau tûr phei chuan mi thiam hrang hrang ngaih dân te pawh sawi kual dâm tûr chu a awm a. Ngaih dân hrang hrang sawi kual vak lovin ngaih dân tha leng lawng pakhat, a tawi thei ang berin sawi tum ila. I lungawi tâwkin kan chhang thei lo mai thei a. Eng pawh ni se, thiam ang tâwk chuan i'n chhâng dân ang hmiang. Matthaia 11:12-a 'vânram chuan beih vakna a tâwk thîn a, a bei vakte chuan an pâwng lâk thîn' tih hi Lal Isuan mipuite hnêna Johana chungchâng a sawi zînga pakhat a ni a. Johana kha mihring zîngah chuan ropui tak mai a ni a, a aia ropui zâwk la chhuak ngai lo ang hialin a sawi a. Chu chu hun remchângah lain Lal Isuan Pathian ram nên a sawi zawm ta nghâl a. He leia Johana ropui tak pawh hi vânramah meuh chuan a tê rawih dân, vânrama mi tê deuh pawh Johana ai chuan a ropui zâwk dân tih thu sawiin vânram ropui dân tûr leh hlut dân tûr goal-ah a vaw lût ta a. Chutiang taka vânram chu ropui leh hlu a nih avâng chuan mi tam takin luh tumin theihtâwp

chhuahin an bei a, chutianga vânrama luh tuma theihtâwp chhuahute chuan vânram chu an chang nge nge thîn a tihna a ni ang a. A nih chiah loh pawhin chutiang lam hawi chu a ni. Beih vak tih chu thil ti mai mai lova tih tak zet leh theihtâwp chhuaha tang tihna a ni. Luka 16:16-a 'mi tin an lût theuh va' tih leh Matthaia 11:12-a 'vânram pâwng lâk' thu nên khân a sawina hmun chu a hrang naa, thusawi tum thuhmunah ngaih mai chi a ni ang.

Upa C. Dârlâwma, Keitum zawhnate

Z.1. *Kan kohhran dân a hmun danga inneihnaah Upa thenkhatin Biak In chang lo inneihnaah kan zai ngai lo ti an awm a, thenkhatin zai ngei a tha ti an awm bawk a. Chutih laiin laina ngah vak lo leh zakzum deuh inneihnaah mi 4/5 lekah kan zai bawk si lo va, rualkhai deuh leh inang tlânga kal dân a awm em min han hrilhfiyah teh.*

Ch. Kohhranah hian tih dân inang tlâng neih chu a tha a. Mahse, kawng engkima tih dân

inan tlântîr tum lutuk erawh chu buaina mai a ni. Kan kohhran hian thil tam takah tih dân inan tlânna kan nei a. Kawng thenkhatah erawh chuan a hun leh a hmun azirin tualchhông kohhran tâna tha ber tûr leh an zawh tâwka an kalpui theih tûra an kuta dah chin kan nei baw a. Hei hi thil tha tak niin a lang. Inneih inkhâwma zai leh zai loh chu inneih tîrtu leh tualchhông kohhran zalênna a ni mai e.

Z.2. *Pathian biak inkhâwm hruaina bu appendix XIV Biak In leh kohhran thil serh humhalh chungchâng tiha inziak ve lo, Pastor leh Upa nemnghehte inkhâwm bâna Biak In chhûnga thla kan lâkpui ta vak vak hi Biak In tihzahawm lohna a tling em? Nge a pawl lo ve kan ti, min han hrilhfiâh teh.*

Ch. Biak In chhûnga thlalâk hi kan Pathian biak inkhâwm leh Biak In zahawmna tihniâm leh tibawrhbang thei zâwnga tih loh tûr a ni. Chin tâwk neih a tha.

***Upa Lalpianthanga,
Mualphêng zawhnate***

Z.1. *Kumin 2018 Nilai zân zirlai February 14 a tang hian*

Makabia kaihhruai, Israel-te leh Suria hote an indo thin thu kan zir a. Tin, Suria sipai hotu Lysias-a a lo lang nual a, February 28 zân zirlaiah khân Jerusalem lama Makabia hote bei tûra an thawh leh dâwn tum hian, Rom sipai General tih a ni leh ta si a. Hei hi tihsual palh nge, a dik tak? (Josephus bu phêk 243-ah te, Makabia bu bung 6-ah te, Jerusalem hman tin ruihnano phêk 39-ah te hi chuan Rom General lam chuan an sawi lo va, thu lâkna hnâr tha tak in neih chu ringin ka'n zâwt a ni).

Ch. Khatih hun lai khân Rom lal ram hi a zau hle a. Suria ram pawh kha lal ram pakhat (Independent ram) ni mah se Rom lal ram thuhnuiaa a awm châng a awm baw a, indo rêng rêngin hun an hmang a ni ber mai. Chu vâng chuan Lysias-a kha Suria sipai hotu a ni thei a, chutih laiin Rom sipai General pawh a ni thei tho baw. A dik theihna lai a awm ve veah ngai mai ila, kan ti sual lutuk lo ang chu maw.

Z.2. *Kum 2018 Nilai Thupui phêk 39, para 2-na, tlar 2-naa, "Rom lalberah a tang ta a,"*

tihi, 'Ram lalberah a tang ta a,' tih zawk tur a ni em le? A chhan chu Demetrius-a hi Antiochus V-na fapa tih a nih si avâng hian.

Ch. Rom lalber Antiochus V (Eupator-a an ti baw) fapa upa ber Demetrias-a kha lalna chuhin a pa lakah a hel a. A pa nêna an inbeih fe hnuah Demetrias-a chuan hnehna a chang ta a. A pa dam reng lai chuan Rom lalber a lo ni ta a ni. Nilai leh Beihruah Thupui Bua mi hi a dikah ngaih mai tûr a ni ang.

***Dr. Pâra, Mission
Vêngthlang zawhna***

Z. *Synod tih hi inkhâwmpui tihna mai a nih laiin eng vâng kher nge kan kohhran Presbyterian sawina atân hman a nih tâk mai le? Catholic te, Karate leh Judo lam leh Hindu puithiamte pawh hian Synod an nei a nia. Synod Office han tih ngawt maite hi a chiangnial lo viau lo maw? Inkhâwmpui office tihna a ni mai dân si a; chutiangin Synod Hospital tih ang chite pawh. Kan kohhran hming hi kan zahpui ta nge,*

Pastor leh Upate pawh hian Presbyterian sawi nân hian Synod an hmang ta fur mai chu a nia. Inkhâwmpui kohhran chu kan ni êm dân em ni? Nomenclature (hming invuah dân) hi uluk a ngai i ti ve viau lo maw?

Ch. Hming invuah dân hi a tîr aţanga uluk leh fîmkhur ngai tak a ni rêng a ni. Synod tih hi inkhâwmpui hming chu a ni teh meuh mai. Kan kohhran hi Presbyterian Kohhran pawh kan ni ngei mai. Mizoramah hi chuan Mizoram Presbyterian Kohhran inkhâwmpui lian ber chu Synod a ni tih chu kan Chiang tlang vek bawk niin a lang. Kan inkhâwmpui lian ber Synod leh kan Mizoram Presbyterian chu inzawm tlat, lâk hran theih loh, sawi hran hleih theih loh a ni. Chu vâng chuan tûn hma aţang tawh khân Mizoram Presbyterian Kohhran sawi nân inkhâwmpui hming Synod hi kan lo hmang tawh a. Synod kan tih hian Presbyterian Kohhran ti angah kan inngai thlap mai a ni. Kan kohhran rorêlna khawiah mah Mizoram Presbyterian Kohhran hi Synod tih tûr a ni tiin

kan rêl lo na a, Mizoram Presbyterian Kohhran sawi nân hian Synod kan ti leh mai thîn zâwk niin a lang. Hetianga tawngkam kan lo hman than tawh hi chu a gramatically-a tehin dik chiah lo mah se, kalhmanga kan lo neih rei tawh avângin dikah kan ngai mai zêl chu a nih hi maw le. Entîr nân: Silchar-ah ka kal tih chu Mizo tawng dik tak a nih laiin ‘Ka zu Silchar lawk alâwm le’ tih chu dik tâwk chiah lo mah se, dikah kan ngai tho chu a ni lo’ m ni? Tûn hma zawng zawngah khân Synod kan tihin Mizoram Presbyterian Kohhran tihnaah kan ngai mai thîn a. Tûn hnu hian dik lo riauva hriatna a awm thar ta a ni zâwk. Tin, kan kohhran hi inkhâwmpui kohhran kan ni lo va, inkhâwmpui thîn kohhran kan ni zâwk bawk.

***Rosângzêla, Venghnuai
zawhna***

Z. *Kristian Tlângauah hian Upa thi te súnna huang kan hmu thîn a. Column zahawm tak a ni a, chutih rual chuan an chanchin ziah dânah hian thenkhat khawvêl thila an eizawwna lam ziah lan a ni a,*

thenkhatah a lang lo va. Chanchin ziah dân hi format fel tak a awm em? Nge Kohhran Secretary-in an duh dânin an rawn thai lang mai thîn?

Ch. Kristian Tlângaua Upa thi súnna huangah hian Upa chanchin ziah dân kaihhruaina hi a tlângpui chuan kan nei a. Zui vek remchân loh hun erawh chu a awm âwm e. A tlângpuiah chuan chhûngkaw lam, Upaa thlan a nih dân leh nemngheh dân, kohhrana mawhpurhna, an hun hnuhnûng leh a vuina tihlan a ni a. Eizawwna tihlan leh tihlan loh hi chu kalhmang zui a awm lêm lo va, kohhran ziaktuin a rawn ziah lan leh ziah lan lohvah a inngat ve bawk. Kohhran ziaktuin a rawn theh luh pawh hi kalhmang inang deuhva lo siam rem thîn a ni.

***Upa Vânlalchhûnga,
Tlângnuam zawhna***

Z. *Synod 2006 General 3-naah Presbytery pathum - Aizâwl, Ramlai leh Tuivaite aţanga “Bial Treasurer te term Synod Finance Committee term zûlzuin kum*

thum ni tawh rawh se” tih chu pass a ni a. Chutih laiin Synod sum vawn dân bung 3-naah hian Treasurer te pahnih ruat dânah inkhâwmpuiin kum tin a ruat thîn ang tih a ni a, hei hi ngaih sual theih tak a ni. Bial thenkhat chuan kum khat chauh te ruatin an thlâk leh mai a, Synod rêl dân leh Synod Sum vawn dân bua mi hi a inkalha ngaih tûr nge a inkalh chuang lo? Rualkhaia kan kal theih nân mîn hrilhfiâh tûrin ka ngên a che.

Ch. Tûn hma chuan (han ti hlui ila) Bial Tresurer term hi Synod Sum vawn dânah ziah lan a ni ngai lo va. Kohhran a lo thang zêl a, duh dân pawh a lo danglam ve tial tial a. Kum 2000 hnu lamah chuan Bial Treasurer-te hi Presbytery Treasurer leh Synod Finance Committee te nêna inlaichînna thûk zâwk neih tûl tihna a lo lian ta a. Irawn sawi ang hian kum 2006 khân, “Bial Tresurer (Synod Sum) hi kum thum term ni tawh rawh se” ti hialin Synod-in ro a lo rêl ta a. Kum 2007 Synod-in a pawm tâk Synod Sum Vawn Dân (Reviesd & enlarged)-ah pawh

Bial Treasurer hi kum thum term a ni tiin ziah lan a ni ta bawh a. Synod Sum vawn dân 2008 hi eng emaw chen kan hman hnuin revised & enlarged bawkin Synod Sum Vawn Dân 2011 a lo chhuak leh ta a. Hei hi tûn thlenga kan hman chu a ni ta a ni. He Synod Sum Vawn Dân kan hman mêkah hian **Bial Treasurer term hi ziah lan a ni ta lo va, Synod-a kal zêl tûr sum vawngtu chu ‘Bial Treasurer’ tih a ni ang.** Bial Treasurer hi kum tin Bial Inkhâwmpuiin a ruat thîn ang a, mi ngai pawh ruat nawn theih a ni ang tiin dah a ni ve leh ta thung a. He kan sum vawn dân hman mêk leh Synod 2006 rorêl hi a tlângpui chuan inkalh lo tûra ngaih a ni ang. A inan lohna ber chu kum thum term a ni ang tih hi a khawng lutuk deuh va, kum tin a ruat thîn ang ... mi ngai pawh ruat nawn theih a ni ang tih hi a nêam ta deuh va. A awmzia ni bera lang chu Bial Treasurer hi kum thum ngei ngei tûr ni tawh lovin kum tin ruat tûr a ni ang a, a duh chuan an Bial tâna tha tûr a nih phawt chuan mi ngai pawh (a kum zât sawi

lovin) an duh chen chen an ruat thei ang tihna a ni ber ang. ‘Bial Treasurer hi kum tin mi **thar** ruat zêl tûr’ tihna niin a lang lo ve. Kum thum term tih kha a hmang duh tân chuan la hman zêl theih niin a lang.

***Upa Malsâwma,
Khawla lung zawhnate***

Z.1. *Kumin 2018 Nilai leh Beihruah thupui kan zirah April 4 thupui Aristobula I-na phêk 63-naah Antigonos-a thattu chu Aristobula a ti a. A lu a tansak a ti a. May 9 thupui Lalna leh puithiam lalber nih inchuhna phêk 89-naah Antigonos-a thattu chu Heroda a ti leh si a, eng nge dik zâwk? Tin, May 16 thupui, Rom lalber nih inchuhnain Juda-te a nghawng dân phêk 90-na, I-na hnuaiah Pompey-a chu a hoten an tihlum a ti a. May 23 thupui Heroda Liana lo din chhuah dân phêk 95-na I-naah a lo lang leh si a. Hetiang deuh hi a awm nualin ka hria a, han sawi fiah deuh teh.*

Ch. Thuthlung Hlui leh Thuthlung Thar inkâr chanchin hi a buai

deuh nuai mai a. Historian-te pawh hian an ziah tam loh pâwl tak a ni âwm e. A ziaik chhunte ziah dân pawh inang lo deuh inkalh deuh titih a tam mai. Ziaik dik sên leh ziaik dik hleih theih pawh a ni meuh lo rêng a ni. Kan sawi fiah thiam tâwk chuang lo mai thei e. Thil awm dân chu hetiang hi niin a lang. Aristobula I-na hun laia Antigonos-a lo lang hi Aristobula I-na unaupa niin a lang a. Aristobula I-na lal hun chhûng hi BC 104 - BC 103 vêl kha a ni a. Lal nih duhna a len êm avângin lalna an chan theihna tûr a nih dân phawt chuan anmahni unau ngei ngeite leh an an chhûngkhat hnaivai tak takte pawh an that hreh hauh lo. Aristobula I-na pawh hian amah dodâl thei mai tûra a ngaih a unaupa Antigonos-a chu a lu tansakin a that ta mai a ni.

Tin, Herodan a thah tâk Antigonos-a ve thung hi chu Aristobula II-na fapa a ni daih thung a. Herodan Antigonos-a a thah hun lai pawh hi BC 37 lam daih kha a ni thung. Heti hi chuan a Chiang deuh tawh mai em aw?



**ZORAM DAM NÂN - ENKGIMAH
PATHIAN HNÊNA LÂWMTHU SAWI
THEOLOGY
(Ephesi 5:15-21)**

- Rev. L.B. Pachuau
Ramhlun North

Thuhmahruai: Zoram, kan ram, Lalpa zawn chhuah ram, harhna thlen zin berna ram, kohhran tamna leh chakna ram, Biak In tamna leh thatna ram, Pathian hnêna thilpêk pêk uarna ram, Revival Speaker tamna ram, missionary tîr chhuak tam ber ram hi zêp rual lovin zu avâng te, drugs avâng te, AIDS natna avâng te, cancer natna avâng tea thih tam berna ram a lo ni ta a. Pulpit tlângah Pastor te, Upa te, Revival Speaker te leh rawngbâwltu dang zawng zawng pawhin kan au chhuahpui nasain kan vei theuh niin a lang. Chuti chung chuan ziaawm lam aiin zual lam, hlual lam a la pan mêk zêl zâwk a. He sual hnathawh leh natna tîhbaiaawm takte hnathawh hi kohhran leh sawrkâr chakna emaw, NGO ho chaknain emaw hneh a har khawp ang. Mi mal leh chhôngkuua do chi a ni. Chuvângin, hnehna kawng awm chhun pawh Pathianin min hnehsakna hmang chauh a ni. Chutichuan, Pathian chakna hmanga hneh theih dân thurûk chu a hnuaia târ lan kan tum ber a ni a. Mi mal leh chhôngkuain uluk taka zir chhuaha hman i tum theuh ang u. A hmang thiam apiangin hnehna kan chang ang a, a hmang thiam lo leh hmang ngam lote erawh chu sual phuarin kan awm reng mai dân a ni.

1. Pathian fa i nihnaah Chiang rawh: Calvinistic theology-ah chuan nu leh pa zirtîrna avâng emaw, thusawitute thusawi ngaihthlâk aţang emawa mihringa Lal Isua rinna, Lal leh chhandamtua pawmna lo awm hi Pathian thlarau hnathawh a ni, an ti a. Chuvângin, miin Lal Isua a rin phawt chuan amahah

Pathian thlarau a awm tawh tihna a ni a. Chuvângin, a piangthar tawh a, chhandam a ni tawh bawk tihna a ni.

Mahni inhre Chiang tûr chuan mahni ngaih dânah inngat lovin Bible-a Pathian thu kan hmuh, hêng kan târ lanah te hian inngat la. Pathian hnênah faa a pawm tawh che avângin lâwmthu sawi

fo la. Tichuan, Pathian aṭanga hriatna leh chianna i nei mai ang.

(a) Pathianin khawvêl a hmangaih êm êm a; chutichuan a Fapa mal neih chhun a pe a, amah chu tu pawh a ring apiang an boral loh va, chatuana nunna an neih zâwk nân (Jn 3:16).

(b) Tih tak meuhvin, tih tak meuhvin ka hrih a che u, tu pawh ka thu hriaa mi tirtu ring chuan, chatuana nunna a nei tawh (Jn 5:24).

(c) Lalpa Isua ring la, tichuan chhandamin i awm ang, nang leh i chhûngte nê (Tirh 16:31).

2. Pathianin i ṭatna tûrin kawng tinrêngin a thawhsak che tih pawm rawh: Pathian chu engkim hmu thei, engkim hre thei, khawi kipa awm a ni a. Chuvângin, i thil tih tawh leh thil tih mêk zawng zawng a hmuin a hre vek a. I thil chin ṭa lo zawng zawng, mipat hmeichhiat kawngah a ni emaw, ei rûk leh hlêp rûk kawngah a ni emaw pakhat mah a hmuh hmai lo.

Pathian chu dik taka rorêltu a ni a, mi tinte an thil tih ang zêlin ro a rêlsak ṭhin a. Chuvângin, kan chung a thil thleng tawh leh thleng mêk zawng zawng hi kan ṭatna tûra a hmangaihna avânga min thawhsakna a ni.

In chhûng khurah thih nain ro a rêl nasa viau em? Zu leh drugs leh AIDS natna tein in chhûngkua a tibuai nasa em? Hrisêl lohna leh natna khirhkhânin in chhûngkua a tibuai nasa em? Eizawna kawngah i hmuingîl lovin i tla chhe nasa em? Nupa kâra harsatnain in nupa nun a tibuai em? Hêng zawng zawng hi Pathianin a hriat loh pakhat mah a awm lo. I tuh rah i seng mêk a ni thei a. A nih loh vêk pawhin Pathian chuan a hmangaih che avângin, amah i tlân bosan loh nân, amah i mamawhzia i hriat theih nân, chûng thil ṭa lo nia i hriat zawng zawngte chu i chungah a thlen a phal tlat mai. Pathian chu hmangaihna leh dikna hmanga rorêltu a ni a. Chuvângin, Pathianin kawng tinrêngin i ṭatna tûrin a thawhsak che tih hi pawm mai rawh.

3. I chungah leh in chhûngkaw chung a thil thleng zawng zawngah Pathian hnênah lâwmthu sawi rawh: I chungah leh in chhûngkaw chung a thil thleng zawng zawng, a ṭa anga lang leh a ṭa lo anga langte pawh Pathian hriatpui, Pathian remruata thleng, i ṭatna tûra

Pathian thiltih a nihzia i pawm tawh chuan, i tih ngei ngei tûr awm chhun chu a hnêna lâwmthu sawi a ni mai. Nupa kêr fel lo in neih chuan Pathian hnênah lâwmthu sawi rawh. I fate zîngah ngawl vei an awm chuan lâwmthu sawi rawh. Hrisêl lohna leh natna khirkhânin a tlâk buak che u chuan Pathian hnênah lâwmthu sawi rawh. Eizawna kawngah harsatna i tâwk a nih chuan lâwmthu sawi rawh. I chungah leh in chhûngkaw chungah thil thleng zawng zawngah tha anga lang leh tha lo anga langah pawh Pathian chu engkim chungah rorêltu, kan thatna tûra kawng tinrênga min thawhsaktu, hmangaihna avâng chauh lo chuan min thunun ngai lotu, engkim bul leh tâwp a ni si a.

4. Engkimah Pathian hnêna lâwmthu sawiin rah a chhuah dân chu:

(a) A hmasa berah chuan hahdamna leh thlamuanna a thlen phawt a. Ni tin zan tina rûm thîn khân kan phurrit zawng zawng Pathian hnênah kan ngah tâk avângin kan hahdam a ni. Chu vâng chuan kan nun chu lâwmnain a khat thîn.

(b) A pahnihnaah chuan kan harsatna chu chin felin a awm

ngei ngei thîn. A hma emaw, a tlai emaw, Pathian chu a lo che ngei ngei a. Kan duh ang leh beisei ang a ni emaw, ni lo emaw chu thu dang. Hmangaih Pathian chuan kan tâna tha tûr ang takin a thawk thîn a, chu chu kan pawm hmiah tûr a ni.

Pathian khawngaihna hnathawh avângin zu ngawl vei te, drugs addict te siam tharin an awm thîn a. Nupa kêr fel lote chin fel a ni a, eizawna kawngah harsatna te chin fel a ni a, natna khirkhân tak tak tuarte tihdamin an awm a, an dam loh vêk pawhin Pathian remruat fel tak avângin thlamuang takin chatuan chawlhnaah an chawl mai thîn. Hla phuahtu pakhat chuan, “I remruata innghat ringtute nun zawngah hian, vuina tûr rêng hi a lo awm lo ve,” a ti a ni.

(c) A pathumnaah chuan hetiang zâwnga an harsatna chin fel dân thiam tawhte nun chu Pathian nêna lèn dun dân kan tih hi a lo ni ta a. An nunin Lalpa a chawimawi a, an dam chhûng nun pum pui chu Pathian fakna leh chawimawina hlîr, lungawina famkim, thlamuanna reh thei lo, Krista hriatpuinaa khat a lo ni ta a ni. A va ropui êm!

AIAWHSAKTU KRISTA (Hebrai 9:23-28)

- C. Lalngûra
Khuanglêng

Ram dânah chuan aiawhsak ngaite chu mi tling zo lo, thil tihsak ngai an ni thîn. Mihringte hian Pathian lam kawngah chuan aiawhsak ngai, mi tling zo lo kan nih kan hriat chian a ngai khawp mai.

He thua chian loh chuan piantharna thua te, rinna kawnga thang lian zêl tûr te pawh hian buai a awl thîn a ni. Chuvângin, Isua Kristan keini mi sualte chhandam kan nihna tûra ai min awhsakna thu hi tawi tein kan sawi ve dân a ni.

Engtin nge Isua Kristan kan ai a awh? Mihringte hi pian tih ata Pathian ânhche dawng, boral tûr kan ni a. Pathian lama thiam kan channa tûr leh chhandam kan nih theihna tûrin amah ngei chu kan tân a inpe a, khen behin a awm a, a thi ta a, chu a thih tûr thu chu amah ngeiin a sawi bawk a ni.

Lal Davidan, “Ka bawhchhiatna te chu ka hre ta si a, ka sual hi ka hmaah a awm fo thîn a ni” (Sam 51:3) a tih ang tho hian hun kal tawha kan thil tihsualte chuan min tibuai fo va, min tihrehawmin min tizak fo thîn. Chûng thilte chuan thiam lo intihna leh beidawnnaah min hruai lût a. Pathian thu erawh chuan Krista chu kan aia ânhche

dawng lo niin, dân ânhche lak ata chu min tlan chhuak ta (Gal 3:13) tiin min hrihl a ni.

Kan sualna avângin kan aiawhin kraws-ah a Pa Pathian lung tiawi tûrin min tuarsak reng a lo ni. Pathian thianghligna leh felna dânah chuan chatuana boral tûr, Pathian hnên thleng zo tawh lo tûr kan ni ngei a. Mahse, pathian berâm no, khawvêl sual kalpuitu Isua Krista chuan kan aiawhin thihna chu a lo thlang ta a ni. Sual man thihna chu kraws-ah min lo tlâksak ta a ni. Pathian nê kan inrem leh theih nân Pathian lung a awi a ngai a, Pathian lung a awi theihna tûr chuan a Fapa Isua Krista chu kan tân kraws-a a thih a ngai a ni. Kawng dang a awm lo.

Krista thihna chuan Pa lung a tiawi: Bawhchhetu kha mihring kan nih miau avângin ran tam tak thisenin min tlan thei lo. Thisen thianghlim, sual kai lo thisen ngei mai a ngai. Chu tlanna thisen atân chuan suala rêng rêng hre ve lo Pathian Fapa Isua Krista thisen chauh chu a tling zo a ni.

Lal Isua chu Pathian leh mihring nih fâwmin khawvêlah a lo kal a. Pathian lung awina tûrin ama thisen chu kraws-ah a rawn hlân a, hla siamtuin:

“An sualna leh âtna te chu,
Ka hre reng tawh lo vang;
An tân ka Fapa a thi si,
Lal Pathianin a ti”

a lo ti rêng a ni.

Chu Isua chu kan sual avângin mantîrin a awm a, thiam kan channa tûrin kaihthawhin a awm bawk a (Rom 4:25) tiin Pathian thuin min hrilh a ni. Pathian ânehhe dawng tawh, amah nen mi hrang lo ni tawh mah ila, kan sualna chu amahah a inbel a, a thisen chuan kan sual zawng zawng min lo tlenfaisak ta a ni.

Lal Isua Krista hi kan aiawhin a thi a ni mai lo va, kan aiawhin a tho leh a ni. Kan aiawha Lal Isua a thihna leh a thawh lehna hi Paula chuan, “Pathian mi thlante chu tuin nge hêk ang? Thiam chantîrtu kha Pathian a ni si a; tuin nge thiam loh chantîr ang? Thia kha Krista Isua chu a ni si a; a ni, tho leh ta zâwka Pathian ding lama awma min sawisaktu bawka kha a ni (Rom 8:33-34) tiin min hrilh.

Lal Isua Kristan kan aiawha thihna a rawn hmachhawn hi a ropui a, Isua inhlanna hi awm ta lo se, thiam loh chang, hremhmun hmabâk mai kan ni. Pathian nêna kan inzawmna chat tawh chu a Fapa Isua hmangin suih zawm leh a ni a, Lal Isua inhlannaah Pa lung a awi a, Pathian nên kan lo inrem leh ta. Lal Isua inhlanna avânga Pathian nên kan inremna hi kan mihringpui te, kan thenawm khawvêngte nêna kan inkârah pawh kan lantîr tûr a ni a, hmelma te hmangaiha an tâna tawngtâisak leh an tâna thil tsa tihsak hi ringtute chuan kan bat tlat a ni tih hi i hre thar ang u. Lal Isuan kan ai min awhsak a, thiam chang kan ni tawh si a.

BEIHRUALIN KUM ZAA TLING DÂWN TA

- Rev. T.Lalmachhuana
Zobawk Pastor Bial

Mizo Kristiante tâna hlu êm êm Beihrial chuan kum za a lo tling dâwn ta a. Kumin 2018 hian a kum za tlin lawmna hun hman tûrin SEC 267-na chuan a lo rêl tawh a. Mihring kum za tling a lâwmawm ang bawkin, Beihrialin kum za a tling dâwn ta hi a ropui a, a lo chhuah dân leh kohhran tâna a tângkai dân hriat chian phei chuan a hlu zual hle a ni. Kohhranin kum za lai, kum tina thla khat pumhlûm a hman ziah hi, engti ang taka kohhran hian la hlâwpui nge a nih leh, Beihrial kan hman mêk hi kohhran hian eng chenin nge kan la hlut tih hi ngaihtuah tham tak niin a lang a. M.Th. Thesis-a ka thil zir chhuahte kohhrante chhiar theih tûr leh kan ngaihtuahna tizauva, kohhran tâna t̃ha zâwk thil te kan ngaihtuah chhuah theih mial takin ka han chhawp chhuak a ni.

1. Alo chhuah dân

Aizâwl Kohhran Committee, March ni 9, 1918-a neih chuan, ringtu la ni ve lote zînga Chanchin T̃ha hril beihpui thla khat chhûng thlâk an rêl a, a hun atân chumi kum June thla chu an ruat a. Hêng hun lai hian Presbytery (tûnlaia Synod) chu kum khatah tûm hnih neih t̃hin a ni a. Kum 1918 October thlaa Hmunhmêlt̃ha Presbytery chuan a kum leh 1919, September thlaa Beihrial chu neih chhunzawm tûrin a rêl a. Beihrial hmasa berah hian

ringthar 344 laiin baptisma an chang a ni. Kum 1920-a Aizâwl Presbytery chuan January thlaa neih tawh tûrin a rêl a; mahse, a kum leh Presbytery chuan April thlaa hman tûrin a rêl leh a. Amaherawhchu, hêng thla te hi an hna ngah lai tak a nih avângin rem lovin an hria a, a hun an ruat t̃ha leh ta a. Kum 1925 atângin September thlaa hman a ni ta ngar ngar a ni. Ram buai laia khaw khâwm leh curfew avânga kohhran t̃henkhata neih theih loh t̃um awm zeuh zeuh tih loh chu, Beihrial hi tuang taka kum tina neih t̃hin a ni.

2. Kohhran tâna Beihrual hlutna

Beihrual hi ringlote ringtua siam tûra Mizo ringtu hmasate hma lâkna a ni a. Hun kal zêlah thlaraubo mai ni lovin, hnung tawlh leh mi hlate ngaihvena, kohhran bêl tûra hnuh hnaih chu a tum ta zêl a ni. Puma Zai lo chhuah laia an khawvêl nun hlui lama kîr lehte hruai lêt tûra kohhran rin râwl ber a ni a. Tûn hmaa an hman tîr lai chuan, chawlhkâr hmasa pahni chu kohhran chhûngkua leh member intlawh chhuah nân an hmang ber a, mi mal ringtu chak lote chu ngaih pawimawh an ni. Hemi hun chhûng hi nasa taka tawngtai leh Pathian thua intihchak tawnna hunah an hmang a. A bâk kâr hnih dang chu ringloho beih hun atân an hmang thîn. Chhûngkua leh mi mal a remchâng apiang Pathian thu an hrilh a, mahni chhûngte phei chu an hrilh nasa lehzual a. Khual khuua an chhûngte thlengin ringtua siam an tum thîn. Chuvângin, Beihrual hi kohhranten tûn dînhmun kan thlen theihna tûra sûl lo sutu ropui leh thawh hlâwk tak a ni.

Tin, Beihrual boruak avângin, Mizo kohhran tiak tîr

te khân missionary rilru a pu nghâl a. Zosap missionary te puitu atân Mizo evangelists leh tîrhkoh an lo chhuak a, Manipur, Tripura leh an chhehvêl hmun dangah te missionary an tîr ta hial a ni. Mizoram Presbyterian Kohhrana missionary rilru la lian êm êm reng pawh hi, Beihrual rah chhuah kal zêl kha a ni a tih theih âwm e. Rev. C. Chawngliana, kum 2010 zirlaibu ziaktu chuan Beihrual hi, “A tîr lamah ringlote Kristiana siam nân a tângkai a. A hnu lamah kohhran tiphûra tipumkhattu a ni a, hun hnunhûng lamah hian a zirtu mi mal tân a tângkai a ni,” a ti a. Ringtharte siama kohhran dinnaa puitu pawimawh tak a ni a. Mizo ringtharte a tiphûr a, a tipumkhat a, an inkûngkaihna a tînghet tlat a ni.

3. Tûn huna Beihrual

Hun a lo kal zêl a, kum 1970 chhovah chuan Mizo hnam pum pui chu Kristian kan ni taa ngaih a ni a. Chanchin T̃ha hril lam ngawr ngawr ti ta lovin, Beihrual pawh thu dangte zira kohhranhote inpâwl khâwmna hun pui takah hman a lo ni ta a. Ringtu mi mal leh kohhran tâna

hlâwk tûr thu zirna huna hman a ni ta ber a. Chutiang a nih avâng chuan, mi tam takin Beihrual chu Bible Study hun pakhatah an ngaih phah hial a ni. Beihrual zirlaite hi a hranga a bua chhuah thin a ni a. Kum 1947 aţang khân Nilai Zan zirlaibu nên a inkawpa tih chhuah a ni ta a. Beihrual zirlaibua kan thu zir hlâwm lian pahnih te, Kristian Chhûngkaw Hapta hi 1977 aţang leh, Ramthar Hapta hi 1978 aţang khân tûn thleng hian kan lo hman ta a ni. Kohhran tam tak chuan, Beihrual thla hi kohhran hma lâknain Gospel camping leh crusade neih hun atân an hman ta a. Aizâwl kohhran eng emaw zâtah phei chuan, kohhran inkhâwm hun pângngaiah chauh inkhâwmin Thalai leh Hmeichhe inkhâwmah te an zir a. Inrin zân chauhva Beihrual thupui zir pawh an tam thei viau âwm e! Tin, Beihrual hi thalai lam aiin upa lamin an ngaihlu zâwkin a lang. Naupang tel an awm meuh lo a tih theih.

4. Beihrual hi engti ang takin nge kohhran hian a la ngaih?

Beihrual kan hman thin dânah hian kohhran hrang

hranga rawngbâwltute leh Pastor-te ngei pawh kan ngaih dân a inpersan hlawm hle mai. Tin, zawhna chhângtute hi kohhrana rawngbâwltu leh inkhâwm thin te chauh an nih avângin, kohhran member zawng zawngte ngaih dân an târ lang pha chiah lo âwm mang e a tih theih baw a. A remchân anga zau leh, khaw hrang hrang leh khawpui kohhrana rawngbâwltu hrang hrangte ngaih dân hetiang hian khai khâwm dân ta ila:

(a) Beihrual hmanngu an tlêm: Mizoram hmun hrang thahnem taka kohhrana rawngbâwltu leh Pastor-te chhânna aţangin, Beihrual inkhâwmah hian, member dân zawhkim aţanga chhiara zaa panga (5%) aia tlêm mah inkhâwm thin ang kan ni! A hmannguten Beihrual programme hi hlâwk ti mah se, a hmanngu tlêm dân enin, kohhran tâna programme hlâwk tâk a la tih theih ang em ?

(b) A hun leh hman rei zâwng thuah: Beihrual inkhâwm neih ţan tih lai chuan September thla chu chhûngkaw tinte âwl hun a ni a. Tûnlai hunah erawh chuan

âwl lai a ni tawh lo va, thal chho, hun nuam leh chhông tinte induh thawh hun a ni tawh. Chhângtu tam zâwk chuan, thla khat chhông zan tina inkhâwm tûra chhuah hi an hman lo va, phurrit a ni tawhin an hria (member tam berte phei chu Beihrual inkhâwma tel ngai lo an ni). Chutih rualin chhângtu hmun thuma thena hmun khat chuan zan tin inkhâwm neih hi tha an la ti a. Chhângtu zâtve erawh chuan kâr khata zan li (thlai leh hmeichhe inkhâwm tel lovin) inkhâwm a tâwk an ti. Inkhâwm ngai lo zawng zawngte ngaihtuah tel chuan, Beihrual hman zêl hi kohhran hian a tlin tawh lo a tih theih ang!

(c) *Beihrual hi kan la hlut em?* Chhângtu hmun thuma thena hmun hnihte chuan, Beihrual hi kohhran member-ten an hlutsak tawh lo niin an hria. Chhângtu pakhat chuan, “A kum zana hi lâwm ila, vui liam ngihl ang u,” a ti hial a ni. Zawhna chhângtu zînga hmun thuma then hmun hnihte hian kohhran inkhâwm a nih avâng leh, rawngbâwltu an nih avâng tel ve thîn chauh an nih thu an sawi. Nupaa kohhran

rawngbâwltu tam zâwkte chuan a inkhâwka an tel thîn thu an sawi bawk. Chhângtu zâtve chuan Beihrual hi a hlâwk lohna an hre lo nain, kohhran thlarau nun châwmna atân a tha tâwk lovah an ngai. Chutih rualin, thu zir te hi ngun taka zir chuan a zirtu tân hlâwkpuï tham a ni a, zirtu an tlêm thîn avâng hian a hlâwk tûr angin kohhranin kan hlâwkpuï lovah an ngai.

(d) *Engtia kalpui zêl chi nge ni ang?* Ahming ‘Beihrual’ hian kohhran mite lung a la lên hle mai a. Chhângtu zâtve chuan Beihrual tih hming hi tûnlai hun mila her remin, hming danga thlâk ni se an duh a. Chutih laiin a zâtve aia tlêm hret chuan Beihrual tih hming hi la pu zêl se an duh. Tûnlai huna kan hlâwkpuï tûr ang zâwnga thupui thlan leh hman dân tûr siam thîn ni se tia duh an thahnem viau bawk.

5. Rawtnate

Chhângtu te rawtna leh mi mal biang biakna aţang te leh, tûnlai huna Beihrual kan hman dânte thlîrin hetiang hian rawtna han siam ta ila:

(a) 'Beihrual' tih hming hian ngainatu a la ngah hle nia a lan avângin, a hming hi la pu zui zêl se la. A hman dân leh thu zir te erawh tihdanglam a hun tawh a tih theih ang.

(b) Hmân lai huna chhûngkaw tinte lo neia khawsa thîn ang kha kan ni tawh lo va. Eng lai pawhin mahni hnaah kan buai tawh a, zan tina inkhâwm hi tu mahin kan tlin tawh lo niin a lang (Aizâwl Kohhran eng emaw zâtte chuan inkhâwm zân pângngai bâk inkhâwm hun an siam belh lo). Chuvângin, Beihrual inkhâwm hi kan inkhâwm dân pângngai bâka ti belh lo hian programme siam ni tawh se. Thu zir tûr pawh chumi mil chuan siam ni tawh se emaw;

(c) Tûn lai huna kohhran thlarau nun leh khawsakna kawnga mamawh puhru tûr zâwna zirlai ruangâm siam thar ni se. Thu zirah hian politics, khawtlâng leh sawrkâr inrêlbâwlna lam hawi leh, dân leh hrai hriatna lam te, hmasâwnna lam kawng leh ei bâr zawnna kawnga inkaihhruaina lam hawite zir tel thîn tûra ruahman ni se.

(d) Thu zir tûr ziaktu atân pawh Pastor senior leh pensioner mai ni lovin, a thu azira mi thiam leh thu ziaik mi te (experts) ruat ni thîn se.

(e) Beihrual Thupui bu hi Nilai Zân thupui bu nên siam kawp tawh lovin a hranga siam ni se. Kohhrana chhûng tinte hnêna sem theih tûra siam ni tawh se.

(f) Beihrual hun hman dân hetiang hian tihdanglam ni tawh se:

i. Beihrual thu zir tûr bu chu chhûng inkhawma zir theih tûra siam danglam hret ni se.

ii. Chhûng tinte hnêna sem vekin, ni tin an remchân hun apianga zir theuh tûrin tih ni se.

iii. Zan tina inkhâwm tawh lovin, Inrinni zân apiangin Beihrual puala inkhâwm ni se. Hemi zân hian Upa bial tinte inkhâwm tamah inel ni se. Tin, hetah hian kar kaltaa sawi ho tûrte a hlâwmin sawi ho ni se. Hemi zân hi chhûng tina member zawng zawngte inkhâwm kim zân tia puangin, chutiang tûr chuan chak taka infuih ni se.

iv. Beihrual thla tâwpa a khârna inkhâwmah, Upa bial tina an

hman dân report kimchang pêk ni se. Tehfung fel taka siam hmanga inel a nih dân avângin, a ti tha bial thlana lâwmman pêk ni se. Tin, a hmang tha chhôngkuate hnênah lâwmman pêk ni bawk se.

v. Hemi bâkah hian group eng emaw zâta inthenin, chhôngkua leh mi mal, kohhran bêl lo leh mi hlate beia, Beihruah thla chhông ngeia kohhran huang chhônga hruai tum ni se. Tin, ruihhlo ngai leh nun hmang dik loten an lo sima, nun kawng dik an zawh theihna atâna beih ni se.

vi. Hetia kohhran member leh chhôngkaw tinte chêt tlânna hian inpumkhatna leh inlungualna te neihtîrin, kohhran tâna thahnemngaihna kawngah nasa takin a pui ngei ang.

vii. Hêng bâkah hian politics lam hawi te, dân leh hrai hriatna lam thil te, eizawna lam leh hmasâwnna lam hawi te, zirna leh hnathawh lama kawng inkawh hmuhna thu te zir leh, a taka training neihna hun atân pawh hman ni se, a taka kan chhawr theih nghâl tûr thil a ni ngei ang. Chutiang chuan kohhran member zawng zawngte tel theih

dân tûr ngaihtuah ruahmanna kalpui theih ni ta se.

viii. Tin, hemi thla hi ‘Dam kim thla’ tia a hming phuah belhin, thlarau lama nâ te, tisa lama damlo te kohhranin ngaihven lehzuah se. Tin, eizawna leh khawsakna thua mi harsa leh rahbi tleu te chawi chhuaha kawng inkawh hmuh thla atân pawh hman ni se, a hlâwkna têtlu tûr chu kohhran bawk a ni dân a ni.

Hêng rawtna leh ngaih dân hrang hrang kan han chhawp chhuah tâk te hi, hmang duh tân chuan tangkai leh hlâwk tak a nih a rinawm a. Chutih rualin Beihruah hian kum za a tling ve tawh dân a, hetia ngun deuh leh zau zâwka zir chian hi a phu êm êm a. Mizorama kohhran lian berin kum za lai a lo kalpui tawh a ni a, kohhrante tân a la tangkaina leh hlutna a neihte zir chian hi thil tûl tak a ni bawk a. Tin, thu zir bu siamna atâna tha leh sum sên râl te, a zirna atâna kan hun sên râl te ngaihtuah telin, kan la hlâwk pui em tia zir leh ngaihtuah hi a ngai hle tawha hriatna nê, hetiang hian ka han chhawp chhuak a ni e.

PRESBYTERIAN KOHHRAN LUNGPHÛM

- Rev. Thangzauva
Ramhlun Vêng, Aizâwl

Kan thupui hi thupui pawimawh leh ril tak, thûk leh zau tak a ni a; vawi khata sawi zawh kim sên a ni lo. Tûn tûmah hian tlêm azâwng chauh kan sawi ang a; chutah pawh Presbyterian Kohhran chungchâng kan sawi hmasa ang a, a dawtah a lungphûm.

I. Presbyterian Kohhran

‘Presbyterian Kohhran’ tih leh ‘Siamthar Kohhran’ tih hi hriat pawlh theih tak a ni a; a tângpuiin English hmanna ramah Presbyterian Kohhran an ti a, English hman lohna ramah Siamthar Kohhran an ti thîn. Mahse, kohhran pakhat John Calvin-a (1509-1564) zirtîrna zuitute vek an ni.

1. Presbyterian Kohhran hian tûbul pahni neiin sawi a ni thîn. A tûbul hla zâwk chu Grik tawnga *Presbuteros* tih a ni a. Kum thua upa, mi puitling leh rin tlâk, Mizovin ‘Vâl Upa’ kan tih ang hi a ni. Thuthlung Hlui hunah Juda-te inkhâwmna (Sunagog)-te kha Rorêl Upaten an enkawl a. Chûng Upate zînga pakhat chu ‘Thu pawt chattu Upa’ an ti a. Thuthlung Tharah chuan Rorêl Pâwl (Sanhedrin)-ten ro rêlin member 71 an ni a; Puithiam Lalber chu Chairman

a ni. Apostol-te hun lai khân chutiang chuan kohhran inrêlbâwl na chu kalpui thîn a ni. Thuthlung Hluia Upa chu Thuthlung Thar hunah chuan Presbyter an ti. Presbyterian Kohhran tûbul chhuitu thenkhat chuan Mosia huna Israel-te inawp dân fêl tak an neihah khân an chhui lût (cf. Deut. 1:13-15).

A tûbul hnai zâwk chu John Calvin-a duan chhuah, puithiamte chauh ni lo, *layman*-te enkawl naa an tel ve theihna tûra kallhmang a duan chhuah hi a ni a; Siamthar Kohhranin kum zabi 15-17 chhûnga a hrin chhuah a ni deuh ber.

2. Presbyterian-ho ti- Presbyterian-tu chu thurin ni lovin, kohhran inawp khawm dân leh rorêlna indawt chhâwng an nei hi a ni. (Pastor Bial Inkhâwmpui, Presbytery, Synod, General Assembly). Chu

chu an ngai pawimawh a, an inchhuan vena thin pawh a ni. A duang chhuaktu John Calvin-a pawhin inrêlbawl dân fel a awm loh chuan kohhran ding theiin a ring lo. Hei hian kohhran inrêlbawlna fel pawimawhzia leh a thlarausia a tilang.

3. Presbyterian Kohhran chuan hotu nghet pahni a nei - Pastorte leh Kohhran Upate. Pastorte chu Kohhran thlarau lam nun châwmtu leh zirtûtu tih an ni ber a. Kohhran Upate chu rorêl Upa an vuah (Tirh 6:1-6). Hetianga sawi ni mah se, rawngbâwlnaah thawk dîn, inñanpui tawn an ni.

4. Presbyterian Kohhran kalhmang hi Bishop nei kohhran leh Tualchhung Kohhran thuneihna inkâra awm, Thuthlung Thar Kohhran inrêlbawl dân hnaih bera ngaih a ni. Kohhran hi Krista taksa a nih hriain, kohhran lû - Isua Krista lalna leh thuneihna tun dinnaa ngaiin kalpui a ni. Kohhran aiawha thlan leh ruat, Pastor leh Upaten Kohhran enkawlna hi an kalpui deuh ber a. Pastor leh Upate chu Lal Isua hniak hnung zuia chhiahlawh rilru pua an mawhphurhnate hlen chhuak tûra beisei an ni.

5. Presbyterian Kohhran chuan rawngbâwlna kawngpui chi hnih a nei: (i) Rawngbâwlna tih mâkmawh leh (ii) Rawngbâwlna tangkai.

Nemngheh rawngbâwlna chu rawngbâwlna tih mâkmawh tiin rawngbâwlna laipui berah a dah a; thu leh sakramen rawngbâwlna tih a ni. Hei hi tirhkohte hun ațanga inhlanchhâwn zêl nia a pawm avângin nemngheh chang tawhte (1 Tim 4:14) kut ațang chauhvîn nemngheh thar tûr pawh an awm tûr niin a pawm.

Rawngbâwlna tangkai tia sawi chu mipui rawngbâwlna hi a ni a. Hei hian rawngbâwlna dang zawng zawng a huam avângin ‘tangkai’ tih a ni. Kohhran Upate pawh nemngheh ni mah se hetah hian rîn luh a ni. Ordained Minister zîngah leh Upa zîngah pawh sâng bîk emaw, hniam bîk emaw an awm lo ve ve.

6. Presbyterian Kohhran chu rorêl khâwmna hmanga inkaihrui kohhran a ni. Mipui aiawha rorêl khâwmna hmanga inkaihrui a ni a. Huho thuneihna kalhmang zui a ni. Jerusalem

Inkhâwmpuiah Tirkhohten, “Thlarau Thianghlim leh keinin...” (Tirh 15:28) an ti ang khân, Thlarau Thianghlim ngaichâng chung a ngun taka an rêl hova thutlûkna an siam chu him berin an hria. Rorêlna thusawiah leh vote-ah an intluk tâng vek a, Pathian aw ngaithla tûrin mipuite an fuih baw k thîn.

7. Presbyterian Kohhran chu Thurin hmanga inkaihruai Kohhran a ni. Thurin a ngai pawimawh hle a. Bible leh Siamthat Kohhranten an uar thurin chu kohhran thanna leh humhalh nân an vuan tlat a. Chu thurin chu hmangin hun thar zêla ngaih dân leh zirtûrna lo chhuak te chu a dik leh dik loh an lo teh thîn a ni.

II. Presbyterian Kohhran Lungphûm

Sam ziaktu chuan, “A lungphûm chu tâng thianghlimah te chuan a awm” (Sam 87:1) a ti a. Mizoten tâng thianghlim tia kan rilruin a kawh chu ‘Kalvari tâng’ mi sualten Pathian khawngaihna avânga chhandamna kan channa hmun, Lal Isua Krista thihna hmun kha a ni. Kha Kalvari tânga Pathian

Fapa Isua Krista thia tak kha kohhranho lungphûm chu a ni. Hla siamtu hian a sawi Chiang hle, ‘*Kan kohhranho lungphûm chu a Lal Krista Isua*’ tiin. Tirkkoh Paula chuan, “Krista Isua ngei chu a kila lung pawimawh berniin, tirkhohte leh zâwlneite lungphûm chung a sak in ni,” a ti baw k (Eph 2:20).

John Calvin-a chuan kohhran a duannaah lungphûm panga a phûm: Rinna chauh, khawngaihna chauh, Pathian thu chauh, Krista chauh tih leh Pathian ropui nân chauh tihte.

1. Kohhran Chanchina a lan dan: Presbyterian Kohhran lungphûm, kohhran chanchina a lan dân lo sawi diat diat ila:

(1) Bible hi rinna leh thiltih tehna dik lo thei lovah a pawm.

(2) Mi mal duhthlanna zalên pawmin Pathian thu zirtûrna pawm leh hnâwl thua te, rin duh leh duh loh thua te - Pathianin mi mal duhthlanna a zahsak a, a tilui lo tih apawm.

(3) Apostol-te thuvawn leh Westminster thurinte chu rinna tehna belhchhahna tangkai takah a pawm.

(4) Thu leh sakramen rawngbâwlina angai pawimawh. Thuhiril hi Pathian biak inkhâwmah a dah pawimawh hle, pulpit dah dânin a tilang. Sakramen chu pâwn lam chhinchhiah hmuh theih leh chhông lam thlarau thatna a ti.

(5) Ringtu zawng zawng puithiamna a pawm. Pathian hnên kan thlen theih nân, Puithiam lalber Isua Kristan kraws-a a inhlanna azârah lal leh puithiamah min pawm a (1 Pet 2:9), Pâ hnên luh leh thlen theihna kan lo nei ta a (Heb 10:19-20; Thup 1:6; 5:10).

(6) Kohhran a dah pawimawh. Kohhran chu Krista taksa a ni a, a lû chu Krista a ti a. Hmuh theih leh hmuh theih loh kohhran a pawm a, a thliar lo va, a inzawm tih a pawm. Kohhran chu pakhat, thianghlim, huapzo leh Apostol-te din chhuah a ni tih a pawm. Kohhran chu Krista chhandamna changtute inpâwl khâwmna, pâwl thianghlim a ni a, khawvêl nun sual laka inthiarfihlîma, nun leh rawngbâwlinaa Pathian chu a laipui bera dah tlat tûra koh chhuah a ni.

(7) Zalên taka Pathian biakna a pawm. Ringtuten zalên taka, Mahni irâwm chhuaka Pathian biak hi Presbyterian Kohhran ze ken a ni. Chutih laiin inkaihhruaina erawh chu a zah a, tihsual laka vêngtu a siam hi a hmang tangkai hle.

(8) Rawngbâwltu, Minister-te hi sâng bîk emaw, hniam bîk emaw awm lovin, an intluk tlâng vek a ni tih a pawm. Chutih laiin rawngbâwltu naupang zâwkten upa zâwkte an zah a; upa zâwkte pawhin naupang zâwkte thiltih thate an ngaihhlutsak thiam thîn.

(9) *Laymen* rawngbâwlina a dah pawimawh. Rorêlnaah Kohhran Upaten ngaihchân an hlawh. Thil bîkah dânzawhkim zawng zawng remtihna tihlan tûl hun pawh a awm bawh.

(10) Kohhran inthununna hi kohhran chakna thahrui a ni an ti thîn. Thununna hi kohhran vawn thianghlim nân leh suala tlute chhan chhuah leh nân lainatna thinlung nêna tih a ni. Kohhran inthununna hi Krista zah vânga tih a ni. Kohhran lu chu Krista a ni a; thu leh thiltiha Krista leh a thu phatsantu chu a taksaah tuar theih rual a ni lo.

2. Pathian thu zirna aṭanga thlîra a inngahna lungphûm

(1) *Rinna thupuana a nghahchhan:* Kohhran chu Krista taksa inpêng tawn vek kan ni tih pawmin (Eph 1:23, Kol 1:18), Thurin puan chhuah a siam a, chûng thurinte chu Westminster Thur nê a inzûl tlângpui.

(2) *Pathian thua a inngahnate:* Bible-a inngat rinna pawmin (2 Kor 13:5; Heb 11:6 etc.) Thuthlung Hlui leh Thuthlung Thar bute chu rinna leh thiltih tehna, dik lo thei lovah a pawm.

(3) *Trinity:* Pathian pakhatah minung pathum - Pa leh Fapa leh Thlarau Thianghlim an awm tih a pawm.

(4) *Pathian lal berna:* Engkim chung a Pathian lal berna leh thuneihna hi rin dân leh pawm dân khai felna hnukpuiah a ngai.

(5) *Chhandamna:* Chhandamna chu Pathian khawngaihna avâng chauhv a lo awm a ni, chu pawh chu Thlarau Thianghlim zâra neih a ni. Chhandamtu atân Krista chauh a pawm, ‘Min chhandam tûr hming dang rêng a awm lo’ (Tirh 4:12).

(6) *Mihring bawhchhiatna:* Mihring hi sualin fan chhuak vek mah se a duhthlanna tihchhiat a nih loh avângin sual lo thei lo chu a ni lo.

(7) *Thlarau Thianghlim:* Thlarau Thianghlim leh a hnathawh an dah pawimawh. Mihring siam tharna leh chhandamna hi Thlarau Thianghlim zâra chanah a ngai.

(8) *Rinna:* Rinna avâng a khawngaihnaa chhandamna chan thu a pawm. Chutih laiin, ‘Rinnain thiam min chantîr’ tia kan sawi hian kan phu rêng vâng ni lovin Krista felna kan chan theihna hmanrua a ni tihna a ni (Inst. 3.18.8).

(10) *Ruat lâwk thu:* Ruat lâwk thu hi Pathian lal berna aṭanga sawi fiah a ni thîn. Mihring duhthlanna chu Pathianin a thlanna leh a ruatna kawnga sûlsutu pawimawh a ni (cf. Rom 8:29). PCI chuan ruat lâwk thu hi thurinah a telh lo.

(11) *Pathian thu dân:* Pathian thu dân chu dân chungnung, a tâwpkhâwk a ni. Pathian chuan a duh zâwng chu a ti mai - hnial phâk tu mah an awm lo.

(12) *Hun hnuhnûng*: Hun hnuhnûng chungchânga Presbyterian Kohhran thurin chu tâna kan Kohhran Thurin No. 10-na nên a la inang zêl.

(13) *Pathian biakna*: Pathian biak inkhâwmah chuan Pathianin hmun laili a chang a; Pathian chu Pathian thu buin a sawi ang zêlin, thlarau leh thutaka biak tâ a ni. Chumi awmzia chu Pathian pâwlina, chhûngrila Pathian biakna tihna a ni. Pathian chu thlarauvin a tithar thinlung puin, khawvêl leh tisa duh zâwng ngaihtuah lovin, tih dân tinrêng Bible tlawh chhan fel tak neiin biak tâ a ni.

(14) *Kohhran rawngbâwlina*: Kohhran rawngbâwlina chu mi thianghlimte that tlânna leh hmasâwnna târa inzirtîma te, hre lote hnêna Isua chhandamna thu hriattîr te a ni ber.

III. Thil pawimawh dangte

1. **Sawrkâr leh kohhran**: Kohhran leh sawrkâr chu tang dân, hnathawh hrang si a ni. Kohhran chuan sawrkâr a tithianghlim ang a, sawrkârin kohhran a humhim ang. He ngaih dân hi Bible thu zirtîma leh

Kristian khawtlâng nun hona kalphung nên pawh a inmil a; ram tina Presbyterian Kohhran pawm dân a ni.

2. **Khawvêl thlîr dân**: Presbyterian Kohhran chuan Pathian chu engkim chung a lalber a nihna aţangin thil a thlîr a; a thu hnuaiah engkim a awm a ni tih a hria. Isua Krista chu hnam nun zia luhchilha siam that hna thawktu a nih hriain, chu hna chhunzawm chuan rawng a bâwl. Khawvêl siam thatu ni târa dah a ni tih a pawm a; khawvêl hi Krista lalna ram atâna thawk târin a ding tih a hria (Thup 11:15).

Tlângkawmna

Kan sawi tâkte kha Presbyterian Kohhran nihphung hriltu - a lungphûm a ni a. Pathian lalnaa inngatin, Krista rilru pua lungphûmin, Bible thutakah dingin, Pathian ram zauna târa beiin, inawp dân fel tak a nei a; chu chuan kohhran a tichakin a tinghet a, Pathian rawngbâwl târin chak takin ke a pêntîr theih phah a ni. A inngahna lungphûmah hian a la inngat zêl em tih hi kohhran kal zêlin a inbih chian fo a ngai ang.

SYNOD HOSPITAL-ATHISEN PÊK CHUNGCHÂNG

*Dr. B. Lalnunthari
i/c Blood Bank
Synod Hospital*

Kristian Thalai Pâwl member-te leh kohhran mi, tlâwmngaia damlote tâna thisen pe thîn zawng zawngte chungah Synod Hospital chuan lâwmthu a sawi tak meuh a ni.

Synod Hospital hian Blood Bank hi March 17, 1997 aţang khân a nei ţan a. Kristian Thalai Pâwl member-te leh kohhran mi inpe tak takte zârah vawiin thlengin thisen pêk tûr haih chham lutuk lovin kan la awm theih phah a ni. Kum khat chhûng hian thisen unit 3000-3500 vêl kan dawng tlângpui thîn a ni.

August 12, 2014 aţang khân kan Synod hma lâknain thisen thliar hranna khâwl (blood component separator) kan lo hmang thei ta a, kan damloten an mamawh ang tak thisen an lo dawng thei ta a ni. Tin, private hospital danga damlo thisen mamawhte pawhin minrawn tawmpui thîn bawk. Kan thisen thliar hran hi thisena a sen lai tak leh a vâ chi hnihah kan thliar hrang a, mi pakhatin a pêk hi chi thumah kan lo thliar hrang

thîn a ni. Chûngte chu lo sawi zau deuh ila.

1. Packed Red Blood Cells (PRBC): PRBC hi ni 24 chhûng a vawn ţat theih a, mihringah thisen tlâkchhamna, natna avâng emaw, thi pût avâng emawa Hemoglobin (Hb) a lo hniam a, a nih tûr aia tlem a awm hian pêk thîn an ni.

2. Fresh Frozen Plasma (FFP): FFP (thisen vâ chi khat) hi thisen tikhangtu coagulation factors an tlâkchhamin pêk thîn an ni. -30°C-ah kum khat chhûng a vawn ţat theih. A hmanna (a) Kângah, (b) Natna hrang hrang vânga thisen vârlachhamah. Entîr nân: thîn ţa lo, Hemophilia, Von Willebrand's disease, DIC etc.

3. Platelets Concentrate (PC): Kan in tihhlam palh châng

pawha thisen zâm hliamrawn thawm phui hna thawktu hmasa ber chu Platelets te hi an ni a, chu chu thi khâr siamtu tiin ko mai ila. Natna hrang hrang vânga Platelets (thisen vâ) a lo tlâk hniamin pêk thin an ni. Entîr nân: Malaria, Scrub Typhus (rannung seh), thin tha lo, septicaemia, ITP etc. 20°C to 24°C-ah ni nga chhûng a wawn that theih.

Hetianga thisen thliar hranna kan lo hman tâkah chuan kan thisen lâk rêng rêng hi kan lâk aţanga dârkhâr hnih chhûngin khâwl hmanga sawngbâwl char char a ngai thin a, chungte avâng chuan Aizâwl khawpui chhûnga blood donation camp kan neih chauhin kan thisen lâkte hi kan thliar hrang hman thin a ni. Tin, hetia thisen thliar hranna kan hman theih aţang hian a hmaa kan lo hman thin thisen thliar hran loh (whole blood) hmanna tûr hi a tlêm ta hle a ni.

Central KTP hian khawpui chhûng Pastor Bial hrang hranga KTP member-te thisen pêk hun tûr calendar a tichhuak thin a, chumi zûlzui chuan Inrinni leh sawrkâr chawlh ni te hi blood camp neih ni atâna hauh leh dah

a ni kumtluan ta deuh a; chungte avâng leh Aizâwl pâwn lama kan lâk te hi thliar hran theih a nih loh avângin khawpui pâwn lamah hian kan chhuak thei ta meuh lo va, in mi hriat thiamna kan ngên ngêl a ni.

Khawpui pâwn lamah KTP member-te nêna blood donation camp neia rawng kan bâwl ho thin hi nuam kan ti hle mai a; chutih rual erawh chuan mi thisen kan lâk kha damloten an hman tûrin ţangkai leh hlâwk thei ang bera hun rei lo tê chhûnga thliar hran a tûl thin si avângin dârkhâr eng emaw zât thanga a hmuna kal chilh hi a remchân lohna lai a awm ta deuh a, Aizâwl khawpui pâwn lam aţanga thisen pe duha minrawn dâwr thin tute zawng zawng pawh in duh ang kan tihhlawhtling vek thei lo a nih pawhin in mi hriat thiamna kan ngên che u a ni.

A tâwp berah chuan he tihdam rawngbâwl hna thawh nâna ţangkai tak maia a thlâwna thisen pêk hi uar zêl ila, a thawktute pawhin damlote tâna chhenfakawma kan thawh zêl theih nân in mi ţawngţaipuina kan ngên ngêl bawh che u a ni.

SYNOD SOCIAL FRONT HRIATTIRNA


1. Synod Charity Store: Synod Social Front thu bawhzuiin chhûngkaw neitung zâwkten an thuamhnaw leh bungrua la hman tlâk si, an hman tângkai tawh lêm loh te leh an thil neih remchâng apiang an theh khâwm a, mi harsa zâwkten an lo hman tângkai theih dân tûr kawng a ngaihtuah a. Chumi atân chuan Synod Charity Store, Zosâpthara Building, First Floor (MS-II/25&26) Mission Vêngah hawn a ni a. Synod Charity Store-a dah tûr hian thawmhnanw hâk chi leh sin tûr chi te, bungbêl te, furniture leh lehkhawb te rawn thawh khâwm tûrin kohhran hrang hrangte a inchhâwkin ngen thîn an ni. Kohhranhote rawn thawh khâwm chu pakhat ₹100 aia to lovin hralh ve thîn a ni a, bungraw hlu bîk deuh erawh chu ₹100 aia tam deuh chhiar ve thîn a ni bawk. Hêng bungraw rawn thawh khâwm thenkhatte chu Ramthar Field lam te, kohhran harsa deuh te leh chhiat tâwkte hnênah a thlâwnin pêk thîn a ni bawk. Charity Store hi ni tin Synod Office chawlh ni tih loh chu dâr 9:00am-5:00pm hawn thîn a ni a, Inrinniah dar 9:00-12:00 noon thleng hawn a ni bawk a, a mamawh apiang tân dâwr theih reng a ni e.

2. Old Age Dar Care (Kum Upate inkawm hlimna): Synod Social Front chuan kum upa tawh, thian kâwm duhte kal khâwma, an inkawm hlim theihna tûr a buatsaih a. Kal khâwmte tân infiamna tûrte leh lehkhaw chhiar tûrte chhawpsak an ni a, an ei leh in tûrte ngaihtuahsak thîn an ni bawk. A remchân dân angin Pathian thu lama inkawmna te pawh neih thîn a ni.

Chawhma lam dâr 10:30-ah hunserh hmanpui thîn an ni a, tlai lam dâr 3:00 thleng hawn thîn a ni. Old Age Day Care Centre-ah hian mi eng emaw zât kal khâwmin an inkawm hlim thîn a, mi thenkhat kal harsat deuh te chu an chhûngten an rawn hruai bawk thîn. Heta kal âwm mi kan hriatte chu kawhbmuh thîn tûrin kan inngên bawk e.

Executive Secretary
i/c Synod Social Front

www.mizoramsynod.org



UPA HMINGLIANA LEITAN



Upa Hmingliana (88), Pu Buanga leh Pi Kawni te fapa hi October, 1930 khân Sihfa kuaah a piang a. April 19, 1955-ah Sêlthangi nêan innei a, fa paruk an nei.

Kum 1973-ah Tual Upa atân thlan a ni a, term hnih a ʔang a. Kum 1979-ah Hmârthlang Presbytery inkhâwmpuiin Leitan Kohhran Upa atân a nemnghet a ni.

Upa Hmingliana hi Kohhran pa nih tling tak, kawng engkima hmahruaitu a ni a, Tualchhông Kohhran, Bial, Presbytery leh Synod thlengin chanvo leh mawhphurhna hrang hrang a chelh tawh.

A kum a lo upat tâk hnu hian thawhah, BP sâng leh zunthlum natnain a tlâk buak a, damdawi inah te enkawl a ni a. Stroke-in a tihbuai belh avângin hniam lam a pan hret hret a, theihtâwpa enkawl a nih laiin November 15, 2018 khân Lalpa hnênah min kalsan ta a ni.

A tûkah amah thlahna hun in lamah Bialtu Pastor R. Lalmangaihan a hmang a, Biak Inah Aizâwl Hmâr Presbytery Moderator, Rev. C. Lalhlîrin a vui a, Kohhran Zaipâwlin thlahna hla an sa a, Bial leh Presbytery huam chhônga Pastor leh Upa ʔahnem tak nêan kohhranhovin ui takin kan thlah liam ta a ni.

- *Upa R. Lalzârzoza*

Leitan Kohhran Ziaktu

UPA R. SÂNGʔHUAMA KOLASIB VÊNGTHAR

Upa R. Sângʔhuama (63), RV Ringliana leh Rokûngi te fapa hi February 15, 1954 khân Pârsenchhîp kuaah a piang a, Mizoram buai avângin kum 1966-ah N. Hlimenah khâwm an ni a, kum 1971-ah Kolasibah a lo pêm a leh a ni. November 30, 1976-ah Lalthianghlimi nêan an innei a, fa pathum an nei.

Kum 2001-ah Hmârthlang Presbytery inkhâwmpuiin Kolasib Vêngthar Kohhran Upa atân a nemnghet a. Kohhranah chanvo pawimawh a chelh kim vek a, Bialah Secretary, Treasurer, Sunday School Secretary leh Synod Music Committee member a ni tawh. Lay Leaders' Training te, Pastoral Care and Counselling Training te tha takin a zo va, BSI-ah life member a ni bawk.

Thisen sâng natnain hun rei tak a tlâk buak chungin kohhran leh khawtlâng a mawphurhna a hlen hrâm hrâm thîn a. Ni 3.11.2017 zân khân a lu a na thut a, damdawi in panpui nghâl a ni a. Tha chhuak leh mai tûra kan beisei laiin ni 15.11.2017 khân Lalpa hnênah min kalsan ta a ni.

Ni 17.11.2017-ah amah thlahna hun in lamah Bialtu Pastor R. Lalhmingsângan a hmang a, Biak Inah Kolasib Presbytery Moderator, Upa R. Lalramhlunan a vui a, Bial Zaipâwl leh Kohhran Zaipâwlin thlahna hla an sa a, ui takin kan thlah liam ta a ni.

- Upa K. Zalawma
Kolasib Vêngthar Kohhran
Ziaktu

UPA MANHLEIA CHAMPHAI BETHEL



Upa Manhleia (81), Pu Kâpsêllova leh Pi Kaiþiangi te fapa hi May 15, 1936 khân Sazêp khuaah a piang a. Sazêp aþangin Zâwlseiah an pêm a, kum 1956-ah Champhaiah an pêm leh a. Kum 1967-ah Rinpui Sailo nêan an innei a, fa pali an nei.

Kum 1981-a Bethel Vêng Preaching Station a dinin Tual Upa atân thlan a ni a. Bethel Kohhran chu kohhran puitlingah hlan kai zui a ni nghâl a. Kum 1983-ah Upa atân thlan a ni a, hemi kum vêk hian Khawchhak Presbytery inkhâwmpuiin Bethel Kohhran Upa atân a nemnghet a, chanvo pawimawh tak tak - Chairman, Treasurer, SS Secretary, SS Suptd., leh committee pêng hrang hrangah Chairman hna a chelh tawh a. Bialah Chairman, Treasurer leh NMCF Chairman te a chelh tawh bâkah Presbytery Standing Committee leh Synod Mission Board member a ni tawh bawk.

Kum 2016 October thla khân pum lam tha lo avângin damdawi inah enkawl a ni a, chumi hnuah rîl cancer a ni tih hmuh chhuah a ni a, zai nghâl a ni. A taksa pawh a lo chak leh deuh va, tha chhuak leh mai tûra kan beisei laiin ni 16.11.2017 khân Lalpa hnênah min kalsan ta a ni.

A tûkah Champhai North Presbytery Moderator, Rev. H. Zathuaman in lama thlahna hun a hman hnuah Biak Inah a vui leh a, ui takin kan thlah liam ta a ni.

- *Upa R. Lalramhluna
Champhai Bethel Kohhran
Ziaktu*

UPALALVUANA NORTH KHAWLÊK

Upa Lalvuana (83), Upa Taia leh Pi Sângliani te fapa hi ni 1.6.1935 khân North Khawlêkah a piang a. Kum 1959-ah Piangthari nêan an innei a, fa pakua an nei.

Tual Upaa tum hnih thlan a nih hnuah kum 1975 khân Hmârphei Presbytery inkhâwm-puiin North Khawlek Kohhran Upa atân a nemnghet a. Kohhranah Chairman, Secretary, Treasurer, SS Suptd., leh Sub-

committee hrang hrangah Chairman a ni tawh a, MSSU chawimawina Diploma a dawng tawh bawh. Inneihna kawltuah term li chhûng a tang a, BSI-ah life member a ni bawh.

Bial Chairman leh Presbytery Sub-Committee hrang hrang leh examiner-ah a tang tawh a. Synod Ramthar Board leh Synod Music Committee Committee-ah a tel tawh bawh.

Kum 2010-ah a rîlphir zai a ni a, kum 2012-ah a kala lungte awm avângin damdawi in panpui a ni a. Aphîng leh a mîtah lungtê a awm tih hriat chhuah a ni a. A phînga mi hi zai a ni a, a mîh hi zai a ni ta lo va. That lam a pan thei lo va, in lamah theih ang anga enkawl a nih laiin ni 19.11.2017 khân Lalpa hnênah min kalsan ta a ni.

A tûkah amah thlahna hun in lamah Pro. Pastor Jimmy Lalsiammawia Fanaiin a hmang a, Biak Inah Tuivai Presbytery Moderator, Rev. Lalram-chhuanglûran a vui a, Kohhran Zaipâwlin thlahna hla an sa a, ui takin kan thlah liam ta a ni.

- *Upa Lalzuahliana
North Khawlêk Kohhran
Ziaktu*

UPA LALRIKHUMA TLÂNGSÂM



Upa Lalrikhuma (77), Pu Zabiaka leh Pi Th̄uampuii te fapa hi kum 1941-ah Tlângsâm khuah a piang a. Kum 1958-ah Bualliani nêan an innei a, fa pali an nei.

Kum 1977-1985 thleng Tual Upa a ni a, kum 1986-ah Khawchhak Presbytery inkhâwmpuiin Tlângsâm Kohhran Upa atân a nemnghet a. Kohhran Chairman, SS Suptd., Treasurer leh Sub-Committee pêng hrang hrangah Chairman a ni a, MSSU chawimawina Diploma leh Jubilee Award a dawng tawh baw. Inneihna kawltu term nhieh a chelh chhûngin tuak 35 a inneihtîr.

September 26, 2017 khân damdawi inah a inentîr a, tum nhieh a lu zai a ni a, hemi hnu hian Tlângsâm lamah hawpui leh a ni a, tha chho zêl tûra kan beisei laiin ni 28.11.2017 khân Lalpa hnênah min kalsan ta a ni.

A tûkah amah thlahna hun in lamah Upa K. Lalzîka, Kohhran Chairman-in a hmang a, Biak Inah Champhai North Presbytery Moderator, Rev. H. Zathuaman a vui a, Kohhran Zaipâwl leh Bial Zaipâwlin thlahna hla an sa a, ui takin kan thlah liam ta a ni.

- Upa F. Lalsângliana
Tlângsâm Kohhran Ziaktu

UPA MÂNGDOVA FÂRKÂWN CHHIMVÊNG



Upa Mângdova (78), Pu Hràwngchîna leh Pi Chhiahzîngi te fapa hi May 12, 1939 khân Thaidawr khuah a piang a. Kum 1963-ah Pi Hramchii nêan an innei a, fa pariat an nei.

Kum 2004-ah Tual Upaah thlan a ni a, kum 2010-ah Upa atân thlan a ni leh a, hemi kum vêk hian Tuipuirâl Presbytery inkhâwmpuiin Fârkâwn Chhimvêng Kohhran Upa atân a nemnghet a. Kohhran Chairman, Secretary, Treasurer leh SS Suptd., a ni tawh a, Bial Standing Committee member leh Sunday

School Secretary a ni tawh a, Presbytery Standing Committee-ah a tâng tawh bawh.

June 2017-ah a pum lam a sawisêl a, pumpui cancer a ni tih hmuh chhuah a ni za, zai a ni a. A natna hi a lo nasat tawh avângin theih ang anga enkawl a nih laiin November 27, 2017 khân Lalpa hnênah min kalsan ta a ni.

Hemi ni hian amah thlahna hun in lamah Upa C. Zokima, Kohhran Chairman-in a hmang a, Biak Inah Tuipuirâl Presbytery Moderator, Rev. Lalhunliana Royte-in a vui a, Kohhran Zaipâwl leh Bial Zaipâwlin thlahna hla an sa a, ui takin kan thlah liam ta a ni.

- *Upa K. Lalzabiaka*
Fârkâwn Chhimvêng
Kohhran Ziaktu

UPA K. THANGKIMA RAMHLUN VÊNGTHAR



Upa K. Thangkima (65), Pu Hmingdailova leh Chawngchhûngi te fapa hi October 8, 1952 khân

Pârsen khuaah a piang a. March 16, 1990-ah Lalpânpuui nêan innei a, fa pakhat an nei. Eizawna lamah Govt. Aizawl North College-ah Associate Professor niin a thih ni thlengin a thawk.

Kum 1999-ah Upa atân thlan a ni a, hemi kum vêk hian Aizawl Hmâr Presbytery inkhâwmpuiin Ramhlun Vêngthar Kohhran Upa atân a nemngnet a. Kohhranah chanvo pawimawh a chelh kim vek a, Bial Secretary vawi hnih leh Presbytery Secretary a ni tawh a, Synod-ah Synod Literature & Publication Board member, Mizo Sunday School Union leh Text Book leh Examination Cell-ah a tel tawh bawh.

Upa K. Thangkima hi thisen sâng leh zunthlumin hun eng emaw chen a tang khân a tlâk buak tawh a, a rawngbâwlna leh a hna erawh chu a thulh phah ngai lo. November 27, 2017 zînga a hna thawk lai chu heart attack a nei thut a, damdawi in panpui nghâl a ni a. That lam a pan nia kan hriat laiin November 29, 2017 khân Lalpa hnênah min kalsan ta a ni.

A tûkah amah thlahna hun in lamah Bialtu Pastor, Rev. K.

Lalthanlian a hmang a, Biak Inah Aizâwl Bethel Presbytery Moderator, Rev. F. Lalchhuanmawian a vui a, Bial Zaipâwl leh Kohhran Zaipâwlin thlahna hla an sa a, Bial chhûng leh pâwna Kohhran Upa te, Pastor leh Minister thahnem tak leh Synod Puipate nêu ui takin kan thlah liam ta a ni.

- *Upa Zakâmlova
Ramhlun Vêngthar Kohhran
Ziaktu*

UPAZAKIAMLOVA SÊRCHHIP CHHIMVÊNG



Upa Zakiamlova (72), Pu Ropianga leh Laichhîngpuii te fapa hi kum 1945 November thlaah Bâwngchâwm khuaah a piang a. November 10, 1971-ah Lallungmuani nêu an innei a, fa pariat an nei.

Kum 2008-ah Tual Upa atân thlan a ni a, kum 2011-ah Upa atân thlan a ni leh a. Hemi kum vêk hian Chhimchhak Presbytery inkhâwmpuiin

Sêrchhîp Chhimvêng Kohhran Upa atân a nemngnet a. Kohhranah chanvo pawimawh hrang hrang a chelh a, Presbytery Standing Committee member ni lai mêk a ni bawk.

September 28, 2017 khân doctor a râwn a, a tûkah a taksa nuam lo zualin damdawi inah admit a ni a. Doctor-ten theihtâwp chhuahin an enkawl a; amaherawhchu, hma a sâwn theih loh avângin Aizawl lama kal tûrin an râwn a, kal tûra an inbuatsaih mêk laiin September 30, 2017 khân Lalpa hnênah min kalsan ta a ni.

A tûkah amah thlahna hun in lamah Upa Chalrotluangan a hmang a, Biak Inah Chhimchhak Presbytery Moderator, Upa Vânlalmuanan a vui a, Kohhran Zaipâwl leh Bial Zaipâwlin thlahna hla an sa a, Presbytery huam chhûng leh pâwn ațanga Upa leh Pastor, Minister leh kohhran mipui thahnem tak lo kal khâwmten ui takin kan thlah liam ta a ni.

- *Upa C. Lalrosânga
Serchhip Chhimvêng
Kohhran Ziaktu*

SYNOD BOOKROOM LEHKHABU THAR

► **Rinna Step thar:** Petera kha Lal Isua rinnain ama kein tui chungah a kal thei a, keini pawh kan Lal Isua rinna hmang vêkin, thil tha ti tûrin keimahni kein kan kal zêl thei tia Rev. V.L. Zaithangan thu tawi 215 hmanga min chawh phûrna lehkhabu hi rinna kawnga step thar i kai nân lo chhiar ve teh le. A man ₹200.

► **Jerusalem-ah Thlarau Thianghlim nen:** Rev. S. Lalkhûman April 2018 chhûnga Jerusalem leh a chhehvêl an fan chanchin chu kal ve lo te tâna fiah, lungkuai leh ngaihnaawm takin a rawn ziaak chhuak a. Kan Lal Isua khawvêla a lên lai nia a chêt tlatna hmun mitthlaa, rinna mitthlaa fang ve duh tân chhiar ve ngei chi a ni e. A man ₹80.

► **Pathian pakhata minung pathum awmte:** Lalthuama Sailo chuan Pathian pakhata minung awmte hi mi thenkhatin sawi bo tâlh tum mah se Bible-ah Chiang taka a awm avânga sawi bo mai theih a nih lohzia uar taka a târ lanna lehkhabu chu a rawn tichhuak ve leh ta. Ngaihnaawm atâna chhiar chi vak chu a ni lo va; mahse, kan rin Pathian hre Chiang duhte tân chuan ngun taka zir chi a ni e. A man ₹70.

► **Ka zin kawng bumboh:** Thingtlâng naupang, zirna thaah pawh kal pha lo, retheihnain a chîm pil lek lek hnua zâm lova taimâkna vânga rawn ding chhuaka IAS officer hial lo ni ta Clement Liankûnga chuan ama chanchin lungchhiatthlâk leh lâwmawm, hlawhtling tûra a beihna hautakzia chu chhiar theihin a rawn peih fel ta. Hlawhtlin tumte tân chhiar ngei chi a ni e. A man ₹200.

► **A ho tlat:** Tûnlai thalaite harsatna chi hrang hrang tuam dam dân tûr mil thei tûra Dr. C. Lalhrekiman thupui hrang hrang hmanga thalaite a fuihna hi a nung a, a tak a, a hohna phêna thu tak inphûm hi dampui tham a ni e. A man ₹200.


► **Hringnun:** MAL-in kum tina lehkhabu tha zual an thlan thin top 3 zînga hla bu lang hmasa ber; Nununa Renthlei ziah, hla ze chi hrang hrang fûn khâwmna chu 2017 Book of the Year top 3 zîngah a rawn lang nawlh mai. MAL meuhin lehkhabu tha top 3 zînga an thlan hi lehkhabu tluangtlam pângngai a ni lo tûrah ngai ila, a dik ang. A man ₹200.

To,



Ebenezer: Kum 1967 Synod Inkhawmpuia Pastor atâna nemngheh; kan kohhran ban rinawm leh mawhpurhna pawimawh tak tak mittlung taka lo hien chhuak tawh Rev. V.L. Zaihangna chuan, 'Hei leh chen hi min hruai a ni,' tiin ama chanchin tu mahin kan lo la hriat-pui lutuk loh te, Pathian hruaina leh awmpuina a dawn te bâkah harsatna hrang hrang a hmachhawn dânte a rawn ziaik chhuak a, lehkhabu hlu tak kan neih belh leh ta. A man ₹150.

Hunpui Sermon: He lehkhabu Upa Dr. K.C. Vânnghâka ziahah hian Mizo Kristiante hunpui hrang hrang - Good Friday, Easter Sunday leh Pentikos Sermon tluantling tak tak 28 zet a awm a. Hêng bâkah hian Bethlehem khawpui leh Good Friday chanchin ngaihnam leh bengvârth-lâk tak a awm bawh. A man ₹250.



Mizoram zirna chanchin: Mi tinin kan ramah zirna tha kan duh a, zirna tha kan duh avânga kan Education system kan thlâk nasat dânte pawh kan hre nual âwm e. Heti lam veia luh-chilh a, DIET Principal hial lo ni tawh V.L. Nghâka chuan Mizoram zirna chanchin, hma a sâwn dân, kan tihsual leh kan tihfuh bâkah zir-nain hma a sâwn lehzualna atâna hmathlir awmze nei tak tak a ziahna lehkhabu chu a rawn tichhuak ta. Zirna vei mite tân chaw tha a ni ngei ang. A man ₹300.

Published by Rev. Dr. C. Chawngmingliana at Aizawl, Mizoram on behalf of
MIZORAM PRESBYTERIAN CHURCH. Typeset by SL & PB and
Printed at the Synod Press, Aizawl - 796 001, Mizoram.

Copies - 40,000